

**Balua gba Polo  
pi omabhuka na gudhu na  
Loma  
Eli na kalanu**

Balua inde li Polo aye nani e pi omabhuka na Loma-a , ani aye nani ngu napa pi uo me ni ne gamu ngu nanu atsia Dadjua na gudhu na Loma. Gamu gba ani adu me ni mene mbo kulu ne omabhuka inde oo, ngubula nedhinga bedi amba u teteke di ni ngubula nanu abhu Esipanye. Ani aye balua angoo ngu nakpokpo lele maka ani ambila lele nabhuka bhú Yesu nde lie di ne ongu inde li nabhuka angoo ngamene e, ngubula mukobho gba omakilisito. Engu li Polo akpokpo e hana abhu bhuku inde.

Pita li Polo ayi okpala na Dadjua na gudhu na Loma di ne ani ayo Ebhe pi uo lie-e, ani akpokpo engu na ngbéngbé inde bhú balua pi uo, engu inde me: Bádha Ngali ngasuno maka li Ebhe ngamene lie me okpala kolo ngbingbili: a ko ka nabhuka, nayie li lilita akolo ali soso (1:17).

Pipita-a, Polo atsia abhulu 'ngu angoo. Ani apa me: i du omaYuda, i du die omupagano, a ayo me u kolo ngbingbili kala Ebhe. Padhá de, anga ndu uo hana amene siti 'ngu. Abhomu-o, li soso, Polo aye ongu pindji lele nadu ka mukobho gba omakilisito, ane la mane li kpadji na mukunda bhú nadu nadjé lio ne okpala koko. Ani atsia agama matá 'ngu pindji ongu maka

kulu gba Ebhe, ne engú inde a ayo me omakilisito mene e pi ongámási na doto, ne bhende gba okpála sùnda o. Anì abu ta balua gba e ne nakpokpo 'ngú gba e makpe di ne oeli bhe nadhege Ebhe.

**Ongbengbe ongú inde bhú bhuku inde-e ngae inde:**

Eli na kalanu ne engú na ngbéngbé inde bhú bhuku inde 1:1-17

Gumú nasia mukobho 1:18 - 3:20

Mabhundja gba Ebhe ngubula mukobho 3:21 - 4:25

Mukobho na mbia bhú Kilisito 5:1 - 8:39

Isalaele bhú mabhundja gba Ebhe 9:1 - 11:36

Lele dasundu gba omakilisito 12:1 - 15:13

Eli na soso ne nayi okpála 15:14 - 16:27

*Polo yi omabhuka na gudhu na Loma mayi*

<sup>1</sup> Ma aye balua inde-e ngama Polo. Ma ne bali gba Yesu Kilisito . Ebhe a'i ma me ma du ne bhulu titima gba ni, ani atsia a'o ma kpi pi e ngú nanu nakpokpo Bádha Ngali gba ni-e pi okpála.

<sup>2</sup> Ebhe apa nani bhutode me ni atima Bádha Ngali bhomu-o pi okpála li kpadji gba opolofeta gba ni-o. Anì apa nani engú ango-o bhú Bhuku gba e-o. <sup>3</sup> Bádha Ngali ango-o pindji ndili gba ani Yesu Kilisito inde Ngámá gba ní-o. U azu ani bhú kute bhú piga gba 'ngbé ngámá Davidi. <sup>4</sup> Engú bini, li kpadji gba Bu Bhobua-a , ani asuno lie maka Ndili gba Ebhe bhú angu nedhinga ani azuku lie bhú ká okpála inde amu-o. <sup>5</sup> Li kpadji gba ani-e, Ebhe asuno bádha bhú 'bu muma me ma kolo bhulu titima gba ani. Ma ne bhulu

titima ngubula me ma gbele ndu okpála inde ne omaYuda ade-e hana me u bhuka Yesu Kilisito, u manga ani, amba u toko la di ani. <sup>6</sup> Ngayi okpála na Loma-a , yi di bhú ká okpála bhomu-o, ngayi okpála inde li Ebhe a'i o me yi kolo di okpála gba Yesu Kilisito-o.

<sup>7</sup> Ma aye balua inde-e pi ndu yi hana, ngayi okpála inde li Ebhe nde ne mukunda pi o-o, ani atsia a'i o me yi du bhú mukobho pi ni-o. A ayo me Ebhe 'Dyi ní, ne Ngámá gba ní Yesu Kilisito suno bádha bhú 'bu gba o-o pi yi, amba u ha di guo 'ngú pi yi.

*Polo apa me ni ne gumu nakpokpo Bádha Ngali gba Ebhe-e pi ndu okpála hana*

<sup>8</sup> Kala ndu 'ngú hana-a, ma ngagie heni pi Ebhe gba ma li kpadji gba Yesu Kilisito. Ma ngagie heni pi ani li 'ngú gba ndu yi hana, anga okpála na píla doto libhomu ngakpokpo 'ngú pindji nabhuka gba yi-o. <sup>9</sup> Ndu nedhinga hana, ma du nayo Ebhe-e, ma ngayo ani ngubula yi. Ebhe apá li ma ngae me a ko kukulu 'ngú. Ma ngamene kulu lima pi Ebhe bhomu-o li kpadji nakpokpo Bádha Ngali inde atsia Ndili gba ani-o.

<sup>10</sup> Ma ngayo Ebhe ndu 'kpí hana me ani kunda-a, ani de bhulu kpadji muma me ma kolo li yi.

<sup>11</sup> Padhá de, anga ma ne gumu naali me ma u yi ngubula me yi sia di bádha bhú 'bu inde ayie ka Bu Bhobua-a, amba yi sia angu li bua yi. <sup>12</sup> Ma akunda mangbo napa me ma ne gumu nakolo li yi ngubula napa me ní to angu bhú ní sunda ní ne yi. Ka nabhuka ní nde ne e bhú Kilisito-o, ma to angu bhú yi, amba yi to di angu bhú ma.

13 Ondaise ma, yi mbila me bhutsibhutsi, ma adu ne mabhundja nanu agba yi, engu bini, ma sia nga kpadji de nato pi naki. Ma ne gumu nago gba yi ngubula me kulu gba ma-a zu di nguwa agba yi maka a azu di nguwa lie agba opiga koko inde ne omaYuda ade-o. 14 Kaka-a, a ayo me ma kpokpo Bádha Ngali pi ndu okpála hana, abana i du pi oGiliki di ne pi okpála inde ne oGiliki ade-o. Ma akpókpo Bádha Ngali bhomu-o pi okpála inde amene balua di ne obhende i mene balua de. Ebhe aha bhobhomu-o muu nae. 15 A bhomu-o ta 'ngu inde ma nde lie ne gumu nago nakpokpo di Bádha Ngali pi yi, ngayi okpála inde ngadalu bhú gudhu na Loma-o.

16 Ma belegu ne numu ade ngu nakpokpo Bádha Ngali-o. Padhá de, anga a bhúbhú ne angu inde li Ebhe ngamene kulu ne e ngu nakobho ndu okpála hana inde ngabhuka-o. Ebhe ade kpadji angu-o ngu nakobho ngaiza omaYuda, pipita-a, okpála inde ne omaYuda ade ko. 17 Padhá de, anga Bádha Ngali angu-o ngasuno lele maka li Ebhe nga'o okpála lie ngbingbili bhú djila e-o. Kpadji angu-o ngakpo lita e bhú nabhuka, engu koko kekele ade. A maka li Bhuku gba Ebhe-e apa lie me: «Kpála inde abhuka Ebhe-e, Ebhe méne me ani kolo bhú djila ni ngbingbili, a ko kpála inde bhú kakulu mukobho.†»

*Bua Ebhe ngake ne osisiti 'ngu gba okpála make*

---

† 1:17 1:17 Tsia bhú Abk. 2:4.

18 Li Ebhe nde lie abhúlá-a, ani ngasuno mbámbá me ni ngazi mbutu li ndu osisiti 'ngú hana inde li okpála ngamene e li ani-o di ne bhe li okpála ngamene e sunda o-o. Ani ngazi mbutu anga ndu osisiti 'ngú li okpála ngamene e ngani kpadji me okpála koko ambíla kúkulu 'ngú de. 19 La-a, engú inde ayo me okpála mbila e li pápá gba Ebhe-e mbámbá pi ndu okpála hana. Ebhe ngae makpe apana pi uo mbámbá.

20 Padhá de, anga nayie maka li Ebhe abho kokpi ne doto lie nakolo pi naki-e, ndu oehe inde ani abho e hana ngasuno ani mbámbá me ani maka da-ie. Oehe bhomu-o ngasuno me a bhú ani ne angu na duduuma, oehe bhomu-o la bhadi ngasuno mbámbá me a ko Ebhe. Kaka-a, Ebhe ti da nambu li okpála inde aziba siti 'ngú-o de. 21 Padhá de, anga abana u ngambila lie hana me Ebhe uu-o, u dhogø ani de, u gie la di heni pi ani de maka ayo lie me u mene pi ani-o. Engú bini, mabhundja gba uo-o ati ngingi, bua uo bhú biti, u mbila matá bádha 'ngú de. 22 U ngapa me a bhú 'ndji o ne imbilangu, engú bini, u akolo obhulu pele. 23 Pi uo-o, ngú napa me u dhogø sangu gba Ebhe inde bhú mukobho duduuma ne duduuma-a, u mene mo-o de. U mangbo ngadhogø okulu 'he inde li okpála abho o maka o-o. La-a, kpála bhú mukobho duduuma ne duduuma ade. U di ngadhogø okulu 'he inde li okpála abho o maka oedhu, maka onu di ne obhende ngagbeke lio ne 'bu o kuto.

24 Kaka-a, Ebhe atse 'kpa li uo me u mene ongu na sisiti inde li bua uo ngakunda me u mene e-o.

U ngamene lie mo-o, u bhomu-o ngamene engú na nɔmɔ lio sɔnda o. <sup>25</sup> Ngauo-o, u a'o nabhuka kɔkɔlɔ 'ngú inde atsia Ebhe-e li ngongo, u atsia abhuka eu. U ngadhɔgɔ oehe inde li Ebhe abho o, uo di ngamene kulu lio pi oehe ango-o, engú bini u dhɔgɔ Ebhe inde abho ndɔ 'he hana ngae de. A ayo la me u de atoko mangbo ani dɔdɔma ne dɔdɔma. A adɔ moko!

<sup>26</sup> Kaka-a, Ebhe atse 'kpa li uo me u mene engú na nɔmɔ li gɔmɔ e asi bhú uo bedhe-o. Olisi gba uo-o nga'o ká obhosi, u ngadhɔkɔ ne obi o olisi mada obhosi. <sup>27</sup> A bhadi pi obhosi moko. U di nga'o ká nadhɔkɔ ne olisi, u abedhe mangbo ne gɔmɔ nadhɔkɔ ne obi o obhosi mada olisi. Obhosi ngamene engú na nɔmɔ ne obi o obhosi koko. U ngagbele pí o makpe bhomu-o ke 'ngú gba Ebhe inde ati ne ngua siti 'ngú u amene e bhomu-o.

<sup>28</sup> Maka li okpála bhomu-o ayala lie nambila kɔkɔlɔ 'ngú inde atsia Ebhe-e, Ebhe atse 'kpa li uo me u abhúndja matá ndjindji de, di ne me u mene engú inde ayo de me u mene e mo-o de. <sup>29</sup> Sisiti 'ngú abedhe li bua uo bedhe, u abedhe ne gɔmɔ 'he gba okpála koko, a ko okpála na siti bua , u ngadje siti bua li obi o naali, u ngabhili obi o, a ko obhɔlɔ nagbe bhayiki, a ko obhɔlɔ kali, a ko obhɔlɔ napa eu ne 'li obi o. <sup>30</sup> U ngapa 'ngú lio sɔnda o sisiti, a ko obhɔlɔ yala gba Ebhe, u ngasobho obi o, u ngadje kɔte o, u ngapa 'li o, uo ndɔ 'kpí hana bedhe 'ngú nabhúndja siti 'ngú koko na mbia, u manga okpála azu o-o de.

<sup>31</sup> Bubua li uo ade, u ngapa 'ngú ne 'li o bhisi

bhisi, u ne mukunda pi obi o ade, ndjinga bhú uo ade. <sup>32</sup> U mbila hana me 'li Ebhe apa me okpála inde ngadhukú li ngua kpadji bhomu-o ati ne nakpi. Abana u ambila lie mo-o hana-a, u bha bini nganu ne kalanu bhú namene ngua osisiti 'ngú bhomu-o. Bhe ane la matá mane-e, u ngakpi ndjili li okpála inde ngamene ngua osisiti 'ngú bhomu-o.

## 2

### *Ebhe ngakodho 'ngú gba okpála li lelele*

<sup>1</sup> Ngamu kpála bhende a'o lie bhú dá djudji ngú nakodho 'ngú gba okpála koko-o, abana mu du bha ne da-ie, Ebhe mbú li mu de. Padhá de, anga nedhinga mu ngakodho 'ngú gba okpála koko lie me mu nde bhadi ngamene 'ngú maka uo-o, mu ngato ngulu mu bhú 'kpú bhomu-o ngamu makpe. <sup>2</sup> Ní mbila hana me Ebhe ngakodho 'ngú gba okpála inde ngamene ngua sisiti 'ngú bhomu-o li lelele. <sup>3</sup> Ngamu kpála inde ngakodho 'ngú gba okpála koko li ngua siti 'ngú inde ngamu makpe mu ngamene e-e, mo obhundja naamu me mo onéke mangimbo gba Ebhe-e maneke?

<sup>4</sup> Nedhinga koko-o, mu ngau Ebhe bhú djila mu padhá, anga ani babadha naali, ani di ne 'ndjá bua, ani di ngandjili má bulu li osisiti 'ngú mu ngamene e-o. Mu u de me ani ngamene mu ndjindji ngubula me mu dji bua mu-o di? <sup>5</sup> Ngamu-o, mu ne kpéke 'ndji, mu kunda nadjii bua mu de. Kaka-a, mu bhomu-o ngagbele pí 'ndji mu mangimbo bhende ane la matá mane

bhú ekpí inde li Ebhe asúno ke 'ngú gba e lie, ani tsia kódho di engú gba okpála hana ngbingbili-o. <sup>6</sup> Ekpí ang-o, ani ahá makalá pì kpála ne kpála li lele kulu gba e inde ani amene e-o.† <sup>7</sup> Ani ahá mukobho na dudu ma pì okpála bhende adhedhe li namene bádha 'ngú-o. Okpála ang-o ngagili sangu sakpa ani, u ngagili me ani pa 'ngú gba o-o ndjindji, di ne me o sia mukobho na dudu ma.

<sup>8</sup> Engú bini, ani asúno ke 'ngú gba e pì okpála bhende agbe kpéke 'ndji li ani-o, okpála inde ayala kukulu 'ngú inde di ngaziba namene siti 'ngú-o. Ani aké 'ngú lie pì uo na kuo kuo! <sup>9</sup> Ndu okpála hana inde ngamene siti 'ngú-o, asía likabhu bhe na kuo kuo! Likabhu ang-o akpó ngaiza li omaYuda, pipita-a i ké di li okpála inde ne omaYuda ade-o. <sup>10</sup> Engú bini, Ebhe ahá sangu pì kpála ne kpála inde ngamene bádha 'ngú, ani apá 'ngú gba uo-o ndjindji, ani tsia há di guo 'ngú pì uo. Ndu babadha 'ngú bhomu-o hana, Ebhe ahá ngaiza pì omaYuda, pipita-a ani tsia há di pì okpála inde ne omaYuda ade-o. <sup>11</sup> Padhá de, anga Ebhe ngakodho 'ngú gba kpála ne kpála li lelele, ani tsia bhúla kpála de.

<sup>12</sup> Ndu okpála hana inde ngamene siti 'ngú mandì nambila líli gba Moidje-e , amú mamu, nakpi gba uo kpáta la lele líli gba Moidje de. Engú bini, ndu okpála hana inde ngamene siti 'ngú me u nde ambila líli gba Moidje hana-a, Ebhe akódho bhadi 'ngú gba uo-o nakpata lele líli bhomu-o.

---

† 2:6 2:6 Tsia bhú Ets. 62:13; di ne bhú Gbt. 24:12.



13 Padhá de, anga okpála inde ngbingbili bhú djila Ebhe-e, a ko obhende ngadje líli gba Moidje ne 'dje o-o de, engú bini, okpála inde ngbingbili bhú djila Ebhe-e, a ko obhende ngamene engú maka li líli-e aziba lie-o. 14 Okpála inde ne omaYuda ade-e, u mbila líli gba Moidje-e de. Nedhinga koko, u la ngamene 'ngú maka li líli apa lie. Bhobhomu-o asuno me líli ango-o asi kuti e abhú uo, belegu u mbila lie de-o. 15 U bhomu-o ngasuno me engú inde li líli-e apa e asi kuti e li bua o. Bua nakpokpo ku 'ngú ne mabhundja gba uo-o bhadi ngasuno moko. Nedhinga koko-o, u ngambila me o omene engú ndjindji ne me o omene sisiti. 16 A bhomu-o engú inde akóto ekpí inde li Ebhe akódho 'ngú gba okpála lie li kpadji gba Yesu Kilisito-o . Ekpí ango-o, Ebhe akódho 'ngú gba okpála maka li Bádha Ngali inde ma ngakpokpo e ngapapa lie-o. Ebhe akódho 'ngú ango-o pindji ongu inde awo lie mawo, inde li okpála ngabhundja e li bua o-o.

### *OmaYuda na kuku-o ngao dho?*

17 La ngamu kpála inde ngapa me ni ne maYuda-a, mu ngalu pí líli gba Moidje-o, mu di ngabhi 'kpa mu pí mbulu mu me ni ne kpála gba Ebhe. 18 Mu mbila engú li Ebhe akunda e hana, líli gba Moidje asuno la bhadi pí mu ndjindji me engú inde babadha ngae dho-ie. 19 Mu ngabhundja li bua mu me ni ngasuno kpadji pí okpála inde i u kpí de. Mu di ngabhundja li bua mu me ni ne zi 'kpí pí okpála inde bhú biti-o. 20 Mu ngabhundja li bua mu me ni ti da nasuno

'ngú pi okpála bhende imbila 'ngú de-o. Mɔ di ngabhundja li bua mɔ me ni ti da nasuno 'ngú pi okpála bhe i bhele nga li kpadji gba Ebhe-e de-o. Mɔ ngabhundja me líli gba Ebhe-e asuno imbilangɔ ne kɔkɔlɔ 'ngú pi ni hana.

<sup>21</sup> Kaka-a, ma ngayi mɔ me, ngamɔ kpála inde ngasuno 'ngú pi okpála koko-o, mɔ suno 'ngú ango-o pi mɔ ngamɔ bhɔbhɔlɔ de ka ni? Ngamɔ kpála inde ngapa pi okpála me u azí 'he de-e, mɔ ngazi 'he ka ni? <sup>22</sup> Ngamɔ kpála inde ngapa pi okpála me u akúnda ɔlɔ, i dɔ di-e bhoko gba kpála koko de-e, mɔ la ngakúnda ɔlɔ, i dɔ di-e bhoko gba kpála koko ka ni? Ngamɔ kpála inde ngayala engú na oebhe na eu-o, mɔ la ngabha oehe bhú 'ti nayo gba uo-o ngú ni? <sup>23</sup> Ngamɔ kpála inde ngabhi 'kpa mɔ pí mbulu mɔ me ni mbila líli gba Ebhe-e hana-a, mɔ nde la ngandjo líli ango-o, okpála ngasiti 'li Ebhe ka mɔ, anga mɔ ngamene engú maka li líli gba ani-e apa lie ade. <sup>24</sup> A maka u aye lie bhú Bhuku gba Ebhe-e me: «Okpála inde ne omaYuda ade-e ngasobho 'li Ebhe ka engú li ngayi omaYuda yi ngamene e-o.†»

<sup>25</sup> † dɔ me mɔ nde ngamene engú maka li líli-e apa lie, nali gandja pi mɔ ne tata. La-a, i dɔ me mɔ nde mene engú maka li líli-e apa lie de-e, a mana mɔgito me mɔ li gandja de. <sup>26</sup> La di-e, li kpála inde i li gandja de-e dɔ namene engú maka li líli-e apa lie, Ebhe ú ani mɔgito me a ko kpála bhe ali gandja. <sup>27</sup> Kpála inde i li gandja bhú kute

---

† **2:24** 2:24 Tsia bhú Isa. 52:5.

de, engú bini, inde i ngamene engú maka li líli-e apa lie, akódho 'ngú gba mụ-o ngae, ngamụ kpála inde i kpata líli-e de, abana inde lie me a ka mụ ne líli, mụ nde ali la di gandja-o.

<sup>28</sup> Padhá de, anga a ko de me kụkụlụ maYuda-a, a ko bha bhende li okpála ngau e li kute e de, inde ali di gandja bha li kute e de, ngú napa me okpála u ne djila o-o de. <sup>29</sup> La-a, kụkụlụ maYuda-a, a ko bhende ne maYuda li bua e, inde ali gandja li lele Bua gba Ebhe, inde i li gandja bha bini ka líli-e de. Kpála ango-o, Ebhe ngatoko ani ngae, okpála toko ani ngao de.

### 3

*Ebhe ndụ 'kpí hana bedhe ngú namene engú inde ani apa me ni améne e-o*

<sup>1</sup> I dụ me a nde mo-o, ta nadụ ne maYuda ne ni? Nali gandja ngateteke kpála lele pi? <sup>2</sup> Ndụ 'ngú bhomụ-o hana bha ndjindji! Ebhe ambamba ngaiza nani ta engú gba e pi uo omaYuda. <sup>3</sup> A na paká me okpála koko bhú ká uo kpata nani ongú li Ebhe apa e ne bua bini-e de. La-a, Ebhe amene bha naae engú inde ani apa nani me ni améne e pi uo-o. <sup>4</sup> Abana li ndụ okpála hana dụ bha ne obhulụ eu-o, Ebhe papa bha naae kụkụlụ 'ngú. A maka u aye lie bhú Bhuku gba ani-e me: «Ngamụ Ebhe, nedhinga mụ ngagama 'ngú lie, ndụ okpála hana ngambila me mụ ne ngbili kpála .

I dụ di me u nde anụ ne mụ gba okpála nakodho 'ngú-o, u ú ehe inde ayo me u holo mụ

li e belegu de bini.†»

<sup>5</sup> Ma gama nga 'ngú nakpata lele maka okpála-kuti agagama 'ngú lie. Nedhinga koko, okpála koko pá me siti 'ngú ní ngamene e ngateteke okpála ngú nambila me Ebhe ne ngbili kpála. U pa mo-o, ní gíe pí uo mangua 'ngú dho? Ní gíe pí uo me a ko paká, Ebhe ne ngbili kpála, anga ani nga'o mangimbo pí 'ndji ní ade. <sup>6</sup> Ebhe bha ndu 'kpí hana ne ngbili kpála, ani ngakodho 'ngú gba okpála na doto kaka.

<sup>7</sup> Engú bini, okpála koko ti da napa me eu o ngapa e ngagbe kukulu 'ngú gba Ebhe bhú mbasu, a di ngaha sangu pí ani. A ko la ni li Ebhe nga'o 'ngú lie pí o mugito me o ne osisiti okpála? <sup>8</sup> Okpála koko ngasobho ya. U ngapa li ya me ya apa me: «Ní mene siti 'ngú, amba ní u lele bádha 'ngú inde akóto bhúbhú-o.» Ebhe a'o mangimbo pí okpála bhomu-o a'o. U ati la bhadi ne di.

*Ndu okpála hana ngamene siti 'ngú*

<sup>9</sup> Nganí omaYuda-a, ní belegu bhú djila Ebhe ngbéngbé ade da nane opiga koko. Ma apa igini apa me ndu ní okpála hana ní sa líli gba siti 'ngú.

<sup>10</sup> A maka u aye lie bhú Bhuku gba Ebhe-e me: «Ngbili kpála ade, belegu de bini.

<sup>11</sup> Kpála inde ngakø mboli 'ngú ade, kpála inde ngagili Ebhe-e belegu ade bini.

<sup>12</sup> Ndu okpála hana a'o ká kpadji gba Ebhe-e a'o, ndu uo hana angita.

Kpála inde ngamene bádha 'ngú-o ade,

† 3:4 3:4 Tsia bhú Ets. 51:6.

belegu de bini!†

13 Tangulu uo mana lata inde li 'bhø e nde bábá.  
'Mi uo ngapa 'ngú napite okpála.

Eli inde ngaze bhú 'bhø uo mana sili kpulu inde  
ngabhili okpála.†

14 U ngatu pødjø li okpála ndu 'kpi hana ne  
'bhø o,

u di ngapa oeli na susu pi uo.†

15 U ngagu holo ne angu o hana ngú nanu nabhili  
okpála.

16 Ndu bili u ngapu li e hana-a, u ngasiti ohe,  
u di ngato mbolo li okpála.

17 U mbila kpadji na guo 'ngú de.†

18 Tsulu Ebhe bhú uo belegu ade bini.†»

19 Ní mbila hana me ndu 'ngú inde u aye e  
bhú líli-e hana, u aye pi okpála inde li Ebhe aha  
nani líli ang-o pi o-o. Ebhe amene mo-o ngubula  
nagbite 'bhø ndu okpála hana ne napa me ni 'o  
mangimbo pí 'ndji ndu uo hana. 20 Padhá de,  
anga kpála bini belegu ade inde i ti da nakoto  
ngbili kpála kala Ebhe ka namene líli-o. Kulu gba  
líli-e bha bini ne nateteke okpála ngú nambila  
me siti 'ngú ngae dho-ie.

*Kpála ngakolo ngbingbili bhú djila Ebhe ka  
nabhuka*

21 Mbia inde-e, Ebhe apana kpadji inde  
ngamene lie me okpála kolo ngbingbili kala ni-  
o. Kpadji ang-o kpi, a koto li líli de. Obhuku

† 3:12 3:10-12 Tsia bhú Ets. 14:1-3, 53:1-3; di ne bhú Ekl. 7:20.

† 3:13 3:13 Tsia bhú Ets. 5:10, 140:3. † 3:14 3:14 Tsia bhú Ets.

10:7. † 3:17 3:15-17 Tsia bhú Isa. 59:7-8. † 3:18 3:18 Tsia

bhú Ets. 36:2.

na olíli di ne obhuku gba opolofeta apa nani engú ang-o kalanu. <sup>22</sup> Kpadji ang-o me, Ebhe nga'o okpála ngbingbili kala e li kpadji nabhuka Yesu Kilisito ka uo-o. Aní ngamene mo-o pí ndu okpála hana inde ngabhuka ani-o. Ndu uo hana ngasia mukobho bha li koli kpadji bini inde gba Yesu Kilisito-o. <sup>23</sup> Padhá de, anga ndu okpála hana amene siti 'ngú, kaka-a, Ebhe bhú sangu gba e adji 'ngbu e li uo adji.

<sup>24</sup> Engú bini, Ebhe bhú bádha bhú 'bu gba e amene me u kolo ngbingbili bhú djila ni padhá. Aní amene mo-o li kpadji gba Yesu Kilisito inde ngagbegbe uo sakpa siti-o. <sup>25-26</sup> Yesu Kilisito ne kpála inde li Ebhe abhu e me aní kpi mada ní ka siti 'ngú gba ní-o. Aní tuko ngute e ngú na'e siti 'ngú gba ní-o. Kpadji ang-o Ebhe aleke pí okpála bhende abhuka-o. Ebhe amene mo-o ngubula me ní mbila me ni ne ngbili kpála. Bhú nedhinga na kalanu-o, nedhinga li okpála adu namene siti 'ngú lie, aní adu ne 'ndjá bua pí uo, aní adu atsia siti 'ngú inde u adu amene e mugito me aní u de. Bhú nedhinga na mbia inde-e, aní ngasuno me ni ne ngbili kpála. Kaka-a, aní a'o ndu okpála hana inde abhuka Yesu-o me u du ngbingbili bhú djila ni.

<sup>27</sup> I nde lie mo-o, engú bini belegu ade inde i ti da naha 'ngbé 'ndji pí ní. Ka ni? Anga ehe bhende ane ne engbé-e, a ko matá namene líli-e de, engú bini, a ko bha bini nabhuka. <sup>28</sup> Padhá de, anga ya au me kpála-kuti ngakolo ngbingbili kala Ebhe ka nabhuka gba e. A ko de me anga aní amene líli-e hana-a de. <sup>29</sup> Yi abhundja naayi

me Ebhe bha ne Ebhe ka omaYuda? A ko di Ebhe gba okpála inde ne omaYuda ade-e di? A mo-o ade. A ko di Ebhe gba okpála inde ne omaYuda ade-o. <sup>30</sup> Padhá de, anga koli Ebhe bha bini. Aní amene me ní 'o omaYuda kala ní ngbingbili lí kpadji na nabhuka. Aní améne bhadi pí okpála inde ne omaYuda ade-e moko. <sup>31</sup> † du me a nde mo-o, a kúnda napa me ní u íbili lílí-e padhá? A mo-o ade, ní mangbo bhomu-o nga'o lílí-e bhú da e.

## 4

### *Nabhuka gba Abalahama*

<sup>1</sup> Ní bhundja nga pindji ogbi ní Abalahama. Ní apá lí 'ngú gba ani-e pí? A akolo nani lí ani ne mangua 'ngú dho? <sup>2</sup> Lí Ebhe ú nani ani me a ko ngbili kpála bhú djila ní ka obabadha kulu inde ani adu amene e, Abalahama de adú ne engú inde ani tí da nabhi 'kpa e pí mbulu e ka e-o. La-a, ani tí da namene bhú djila Ebhe mo-o de. <sup>3</sup> Padhá de, anga Bhuku gba Ebhe ngapa me: «Abalahama abhuka Ebhe, abhomu-o Ebhe atsia au ani me a ko ngbili kpála ka natsia nabhuka gba ani-o.†» <sup>4</sup> Ní mbila hana me lí kpála mene kulu-o, u há kuo 'kpa pí ani tété, kuo 'kpa bhomu-o ha lie pí ani padhá de. Aní amene ngánga kulu. <sup>5</sup> La-a, lí kpála mene kulu de, ani bhuka me Ebhe ngasia obhulu namene siti 'ngú-o, nabhuka gba ani-e nga'o ani ngbingbili bhú djila Ebhe. <sup>6</sup> Kaka-a, Davidi ngapa 'ngú na djali gba kpála inde lí Ebhe au e maka ngbili kpála

† 4:3 4:3 Tsia bhú Dje. 15:6.

bhú djila e-o, inde ani tsia okulu gba e de-o.

<sup>7</sup> Davidi apa me:

«A ko djali pi okpála inde li Ebhe ambu li ndjondjo gba o ambu, okpála inde li Ebhe a'e osisiti 'ngú gba o a'e-o!

<sup>8</sup> A ko djali pi okpála inde li Ebhe Ngámá lila osisiti 'ngú gba o li bua e de-o!†»

<sup>9</sup> Engú li Davidi apa e bhomu-o, ne me a atsia bha bini okpála bhende ali gandja, ne me a atsia di obhende i li gandja de-o? Ní de ngapa me: «Ebhe au Abalahama ngbingbili bhú djila e, anga Abalahama abhuka ani.» <sup>10</sup> Engú bhomu-o akodho 'kpí nadho? Ne me a ko me Abalahama nde ali gandja ali, ne me a ko me ani nde li nga gandja de? A mo-o ade, a ko kala me Abalahama li gandja.

<sup>11</sup> Kala me Abalahama li gandja-a, Ebhe au ani bhú djila e me a ko ngbili kpála. Pipita-a, Ebhe apa pi ani me ani li gandja. Gandja bhomu-o adu maka ehe inde asuno me ani ngbingbili bhú djila Ebhe kabula nabhuka gba e-o. Kaka-a, Abalahama akolo 'dyi ndu okpála hana inde ngabhuka Ebhe mandi nali gandja. Ebhe ngau ndu okpála bhomu-o hana bhú djila e ngbingbili maka ani au nani Abalahama lie-o. <sup>12</sup> Abalahama di ne 'dyi okpála bhende ali gandja-o. A akunda napa me Abalahama di ne 'dyi okpála inde ngakpi bha bini ndjili li nali gandja ade, engú bini, inde ngakpata lele nabhuka inde adu nani bhú ogbi ní Abalahama kala me ani li gandja-o.

† 4:8 4:7-8 Tsia bhú Ets. 32:1-2.



<sup>13</sup> Ebhe apa nani pi Abalahama ne odi e me ni ahá doto pi uo. A ko de me Ebhe apa nani engú bhomu-o ka anga Abalahama amene líli-e de, a ko mangbo anga Ebhe au nani ani ngbingbili bhú djila e ka nabhuka gba e-o. <sup>14</sup> I du me okpála bhende ngamene líli-e nde asia bha bini ohe li Ebhe apana e ngao, a akunda napa me tata li nabhuka ade. La di-e, engú inde li Ebhe apa nani me ni amene e pi uo, a ko 'ngú na padhá. <sup>15</sup> Padhá de, anga nedhinga li okpála adje líli lie, i du me u nde kpata de-e, li Ebhe ké 'ngú lie. La-a, bili li líli nde li e ade-e, u agumu líli-e lele pi?

<sup>16</sup> A bhomu-o engú yi ngau lie me Ebhe apa nani me ni ahá doto pi Abalahama ne odi e kabula nabhuka gba e ngubula me a adu pi uo maka ehe ani aha e pi uo padhá bhú bádha bhú 'bu gba e-o. Oehe li Ebhe apa me ni ahá e pi okpála-a, a bha bini pi obhende ngakpata líli-e ade, engú bini, a di pi okpála inde abhuka Ebhe maka Abalahama abhuka lie-o. Kaka-a, Abalahama ne 'dyi ndu ní hana. <sup>17</sup> A maka u aye lie bhú Bhuku gba Ebhe-e me Ebhe apa pi Abalahama me: «Ma a'o mu 'dyi okpála na opiga bhelé.†» Abalahama ne 'dyi ní bhú djila Ebhe inde ani abhuka e-o. A ko Ebhe inde ngazuku okpála inde amu, inde di ngabho oehe inde nga ade-o.

<sup>18</sup> Abalahama adu bha ne nabhuka bhú Ebhe, ani atsia adu bha na'o 'to e 'to ani. Natsia la lele ani-e, a ko nani kpála inde i ti matá nani da na'o 'to e 'to ehe inde li Ebhe apa me ni ahá e pi

---

† 4:17 4:17 Tsia bhú Dje. 17:5.

ani-e de. Abhomu-o, Ebhe amene engú ani apa nani me ni améne e pi ani-o. Ani atsia akolo 'dyi okpála na opiga bhelé maka li Ebhe apa nani lie pi ani me: «Opiga gba mu-o adú bhelé.†» <sup>19</sup> A abhaka me ani nde ne kalanga masikpe de kámá bini. Ani adu nambila ndjindji me ni agbe, ani adu di nambila hana me wala ni Sala ne izude, engú bini, nabhuka gba ani-e gie lie ne sidi de. <sup>20</sup> Ani adu bha nabhuka me Ebhe ahá ehe inde ani apa me ni ahá e pi ni-e maha. Ani du ne bua bhisi bhisi de da napa me ni gbe 'to ni 'to Ebhe-e de. Engú bini, nabhuka inde ani adu ne e bhú Ebhe-e, adu bha naha angu pi ani ngú nanu ne kalanu, ani atsia adu adhөгө Ebhe. <sup>21</sup> Ani adu nabhuka na paká me Ebhe ne angu ngú namene engú inde ani apa me ni améne e-o.

<sup>22</sup> Ka nabhuka gba Abalahama-a, Ebhe au ani bhú djila e me a ko ngbili kpála. <sup>23</sup> I du me Bhuku gba Ebhe-e nde apa me, Ebhe au ani bhú djila e me, a ko ngbili kpála-a, a ko bha bini pi ani kpi e kpi de. <sup>24</sup> Eli bhomu-o aye di lie pi ní okpála inde li Ebhe aú o bhú djila e me ní ne okpála na ngbingbili-o. Padhá de, anga ní ne nabhuka bhú Ebhe inde azuku Yesu Ngámá gba ní-e bhú ká okpála inde amu-o. <sup>25</sup> Ebhe apu Yesu pi okpála ngubula me u bhөлө ani li 'ngú na siti 'ngú gba ní-o. Ebhe atsia azuku ani bhú ká okpála inde amu-o ngú napa me ní kolo ngbingbili bhú djila ni.

## 5

---

† 4:18 4:18 Tsia bhú Dje. 15:5.

*Yesu ato guo 'ngú sùnda ní ne Ebhe*

<sup>1</sup> Ɔ nde lie me Ebhe au ní me ní ne okpála na ngbingbili bhú djila e ka ní abhuka ani lie, ní mbia inde-e ne guo 'ngú sùnda ní ne Ebhe li kpadji gba Yesu Kilisito , Ngámá gba ní-o. <sup>2</sup> Yesu abhulu kpadji pi ní ngae ngabula me Ebhe suno bádha bhú 'bu gba e pi ní li kpadji na nabhuka . Nabhuka gba ní-e alu pí bádha bhú 'bu bhomu-o. Ní la bhadi ngakpi djali anga ní nga'o 'to ní me Ebhe ahá di sangu pi ní maka ani aha pi Yesu lie-o. <sup>3</sup> A pise bha bini li bhobhomu-o de. Ní di ngakpi ndjili bhú likabhu ní ngazu e anga ní ambila me likabhu ngaha pi ní nambila nadu ne 'ndjá bua. <sup>4</sup> Nadu ne 'ndjá bua ngaha pi ní nasia angu bhú kpéke da 'ngú, ní sia angu bhú kpéke da 'ngú-o, bhobhomu-o ngaha pi ní me ní 'o 'to ní li engú li Ebhe apa me ní améne e-o. <sup>5</sup> Ní du na'o 'to ní 'to engú li Ebhe apa me ní améne e mo-o, a padhá ade. Padhá de, anga li kpadji gba Bu Bhobua-a , Ebhe asuno me ní abedhe ne mukunda pi ní bedhe.

<sup>6</sup> A ko paká, nedhinga ní adu lie me ní nde ti da nagbe 'ndji ní de-e, Yesu Kilisito akpi li 'ngú gba ní osisiti okpála li nedhinga inde li Ebhe a'o nani e-o. <sup>7</sup> Ní mbila hana me, da napa me kpála ziba nakpi li 'ngú gba ngbili kpála kpekpeke. Nedhinga koko-o, kpála ti da naziba mangbo nakpi li 'ngú gba kpála na bádha 'ngú. <sup>8</sup> Engú bini, ehe inde asuno me Ebhe ne mukunda pi ní e ngae inde: nedhinga ní adu nga bha lie bhú siti 'ngú-o, Yesu Kilisito akpi li 'ngú gba ní-o.

<sup>9</sup> I nde la lie me mbia inde-e Ebhe au ní okpála na ngbingbili bhú djila e li kpadji na ngute ani-e, ní mbila me ní akóbho bhú 'bhø ke 'ngú gba Ebhe-e li kpadji na ngute ani. <sup>10</sup> Nani kalanɔ, nedhinga ní adu lie nayala Ebhe-e, Ebhe ato guo 'ngú sɔnda ní ne o li kpadji nakpi gba Ndili gba e-o. Kaka-a, ní mbila ndjindji me maka li Ebhe ato guo 'ngú lie sɔnda ní ne o ato-o, ani akóbho bhadi ní li kpadji gba Ndili gba e, anga Ndili ango-o bhú mukobho. <sup>11</sup> La matá pépé-e, ní ngakpi djali li 'ngú li Ebhe amene e li kpadji gba Ngámá gba ní Yesu Kilisito-o. Padhá de, anga ani amene me guo 'ngú li sɔnda ní mbia inde-e ne Ebhe.

*Ní ali bhú mangimbo ka Adamɔ , ní akobho ka Yesu*

<sup>12</sup> Ní mbila hana me, siti 'ngú ali píla doto ka koli kpála bini má kpikili! A 'li kpála ango-o me Adamɔ . Siti 'ngú ango-o atsia azu kuo. Ka li ndu okpála hana amene siti 'ngú lie, kuo atsia akolo li ndu uo hana. <sup>13</sup> Kala me Ebhe ha líli gba e pí Moidje-e, siti 'ngú adu nani píla doto. Engú bini, inde lie me Ebhe nde ha nga nani líli gba e pí okpála de-e, ani du na'o 'to e 'to siti 'ngú gba uo de. <sup>14</sup> La-a, abana a adu lie mo-o, nayie li Adamɔ, nakolo li Moidje , kuo adu ne angu pí ndu okpála hana, abana pí okpála bhende i mene siti 'ngú maka Adamɔ andjo nani 'li Ebhe lie de-o. Adamɔ nani ne kulu kpála inde a ayo nani me ani go-o.

<sup>15</sup> Engú bini, siti 'ngú gba Adamɔ-o kpo 'ndji e ne bisagu li Ebhe aha e padhá-a de. Eu ade,

okpála bhelé amu kabula siti 'ngú gba koli kpála bini bhomu-o. Engú bini, bádha bhú 'bu gba Ebhe-e ane ne engbé. La di-e, bisagu inde ani aha e padhá pí okpála bhelé li kpadji gba koli kpála bini inde 'li e me Yesu Kilisito-o, ane di ne engbé. <sup>16</sup> Bádha bhú 'bu li Ebhe aha e pí okpála-a naae ngazu ngua koko. A viti bini ne siti 'ngú inde li koli kpála bini bhomu-o amene e de. Siti 'ngú li koli kpála bini bhomu-o amene e, amene me Ebhe 'o 'ngú pí okpála. La-a, bádha bhú 'bu li Ebhe aha e pí okpála padhá pita u amene siti 'ngú lie bhelé-e aha pí uo me u kolo ngbingbili kala Ebhe.

<sup>17</sup> A na paká me kuo apa lie li okpála ka siti 'ngú gba koli kpála bini. Engú bini, kpála bhe koko inde 'li e me Yesu Kilisito-o ngamene naae okulu na ngbengbengbe. Li kpadji gba ani-e, Ebhe ngasuno bádha bhú 'bu gba e inde ane mane-e pí okpála padhá, ani di ngau uo bhú djila e me a ko okpála na ngbingbili. Bha li kpadji gba ani-e, u asía mukobho na duduma, u aú di ngámá ka ani.

<sup>18</sup> Ní au me kabula siti 'ngú gba koli kpála bini inde 'li e me Adamu-o, mangimbo gba Ebhe-e ati pí ndu okpála hana. A bhadi moko, kabula bádha kulu gba kpála bini inde 'li e me Yesu Kilisito-o, okpála hana akolo ngbingbili bhú djila Ebhe. Bádha kulu gba Yesu Kilisito di ngaha mukobho pí okpála ngae. <sup>19</sup> Ka li kpála bini andjo 'li Ebhe lie, okpála bhelé ati bhú siti 'ngú. A bhadi moko, ka li kpála bini adje 'li Ebhe lie, okpála bhelé akolo ngbingbili bhú djila ani.

20 Pindji bhende atsia líli gba Moidje-e , Ebhe aha nani pi okpála ngae. La natsitsia-a, siti 'ngú atsia abe matá ndu e naali. Engú bini, li bili inde li siti 'ngú abe ndu e lie, bádha bhú 'bu gba Ebhe abe la matá ndu e ane mane. 21 A bhadi moko, maka li siti 'ngú apana angu e pi okpála lie li kpadji gba nakpi-e, bádha bhú 'bu gba Ebhe-e apána bhadi angu e pi okpála li kpadji nakobho uo. Bádha bhú 'bu angu-o améne me ní kolo bhú mukobho na dudu ma li kpadji gba Yesu Kilisito, Ngámá gba ní-o.

## 6

*Ní akpi bhú dabili bini ne Yesu, ní azúku bhadi maka aní*

1 Ní apá la ibili pi? Ní mene bha ibili siti 'ngú ne kalanu, amba bádha bhú 'bu gba Ebhe-e nu ne kalanu? 2 Belegu de bini! Ní amu li pabili gba siti 'ngú amu. Lele pi ní ti lie matá da nanu bhú siti 'ngú ne kalanu-o? 3 Yi mbila de me nedhinga ní asia batisimo lie, ndu ní hana ní akpøtø liní bhú dabili bini ne Yesu Kilisito bhú nakpi ka e di? 4 Li kpadji na batisimo-o, ní amu ne aní bhú dabili bini, u atsia azi ní ne aní bhú lata bhú dabili bini ngubula me Ebhe 'dyi ní zuku di ní bhú ká okpála inde amu-o maka aní azuku Yesu Kilisito lie bhú angu gba e inde ane mane-o. Aní azuku ní ngubula me ní du di ne lele mukobho na mbia.

5 Padhá de, anga maka ní akpøtø liní ne aní lie bhú ngua nakpi inde aní akpi e-e, ní azúku bhadi ngua nazuku inde aní azuku e-o. 6 Ní

mbila ndjindji me, nedhinga li Yesu Kilisito akpi lie li kulusi-e, Ebhe agi lele mukobho gba ní na kalanu-o bhadi li kulusi oo ngabula me lele mukobho bhomu-o kpi di, amba ní adú matá obalise gba siti 'ngú de. <sup>7</sup> Padhá de, anga kpála inde akpi-e, akoto bhú bali gba siti 'ngú akoto. <sup>8</sup> Ɔ du me ní nde akpi bhú dabili bini ne Yesu Kilisito akpi-e, ní bhadi ne nabhuka me ní adú bhadi ne ani bhú mukobho. <sup>9</sup> Yesu Kilisito azuku nani azuku. Ní mbila hana me nayie li 'kpi bhomu-o, ani kpí matá-a de. Nakpi matá ne angu pí ani ade. <sup>10</sup> Bhú nakpi ka ani e-e, ani akpi li pápá na siti 'ngú bhutsibhutsi bini má kpikili! Ani nde lie bhú mukobho mbia inde-e, ani bhú mukobho pí Ebhe. <sup>11</sup> A viti bhadi bini, ngayi di-e, yi 'o liyi mugito me yi amu li pápá gba siti 'ngú-o amu. La mbia inde-e, yi bhú mukobho pí Ebhe li kpadji na makpetse gba yi ne Yesu Kilisito.

<sup>12</sup> Ɔ nde lie mo-o, a ayo matá de me siti 'ngú ko angu e pí kute yi na kukuo inde-e de. Yi adhúku li lele gumu na sisiti gba kute yi bhomu-o de. <sup>13</sup> Yi a'ó matá oyá yi de me adu bhú kulu gba siti 'ngú maka otia kulu gba ani-e de. Yi ha mangbo liyi pí Ebhe maka okpála inde amu, u atsia azuku. Yi ha liyi libhomu ngú kulu gba Ebhe maka otia kulu ngú namene ngbili 'ngú . <sup>14</sup> Padhá de, anga a ayo de me siti 'ngú ko matá angu e pí yi-e de, anga yi matá sa líli ade, engú bini yi mangbo sa bádha bhú 'bu gba Ebhe-o.

*Ní matá ne obalise gba siti 'ngú ade, ní ibili ne obalise gba Ebhe*

15 Mbia inde-e, ní matá ngadhukú sa líli ade, ní mangbo sa bádha bhú 'bu gba Ebhe. Í nde lí mo-o, a ayo me ní nù bha ne siti 'ngú ne kalanú anga ní nde sa bádha bhú 'bu gba Ebhe? Belegu de bini! 16 Yi mbila hana me í dũ me mũ nde bhú kulu gba kpála bini ngú namene engú ani akunda e-e, mũ ne bali gba kpála inde mũ nde bhú kulu gba e-o. Í dũ me mũ nde bhú kulu gba siti 'ngú-o, mũ ne bali gba ani. Mũ dũ bhú kulu gba Ebhe-e, mũ ne bali gba ani. Yi mbila la me, siti 'ngú ngato kpála bhú kuo. Engú bini, namanga Ebhe ngamene me Ebhe 'o kpála ngbingbili bhú djila e.

17 Heni pí Ebhe, anga yi dũ nako ne obalise gba siti 'ngú, la mbia inde-e, yi abhuka Ebhe. Yi atsia aziba di ne bua yi bini nadũ bhú mukobho nakpata lele nasuno inde u asuno e pí yi-o. 18 Ebhe agbegbe yi bhú bali gba siti 'ngú-o agbegbe, yi atsia akolo obalise gba ani ngú namene engú inde ngbingbili. 19 Ma ngakpokpo 'ngú bhomũ-o pí yi ne nasusuno lí kute obalise, anga yi ngakø mboli engú má gala ade. Nani kalanũ-o, yi aha kute yi libhomu maka obalise inde bhú kulu gba siti 'ngú inde ngazu kpéke 'ndji lí pabilí gba Ebhe. Maka yi aha nani liyi lie libhomu pí siti 'ngú-o, mbia inde-e, yi ha di liyi libhomu pí Ebhe maka obalise inde bhú kulu gba ngbili 'ngú ngubula me lele mukobho gba yi-e dũ bhende ngangá lí Ebhe manga.

20 Nedhinga yi adũ nako lie obalise gba siti 'ngú-o, ehe bini ade inde í tí nako da natima yi me yi mene ngbili 'ngú. 21 Nedhinga yi adũ



lie amene osisiti 'ngú inde nga'o naki nũmũ li yi bhomũ-o, yi asia bhúbhú mangua bádha 'ngú dho? Ehe bini ade! Ongú bhomũ-o ngatima kpála bhú kuo. <sup>22</sup> La mbia inde-e, Ebhe agbegbe yi bhú siti 'ngú agbegbe, yi atsia akolo okpála na kulu gba ani-o. Li kpadji bhomũ-o, yi asia nadũ bhú mukobho inde ngangá li Ebhe-o. Ali soso-o, yi asia mukobho na dudũma. <sup>23</sup> Padhá de, anga makalá gba siti 'ngú-o, a ko nakpi, engú bini, Ebhe naae ngaha pi okpála mukobho na dudũma inde bhú Yesu Kilisito Ngámá gba ní-e padhá.

## 7

### *Ní aze bhú bali gba líli-e aze*

<sup>1</sup> Ondaise ma, yi mbila engú inde ma adjí apa e hana, anga yi ambila líli-e ndjindji. Yi mbila hana me líli ngako angu e pí kpála bha bini li nedhinga ani nde lie bhú mukobho-o. <sup>2</sup> Ní ha nga kukulu li elø inde bhú kũva. Nedhinga li 'ko ani nde lie tété-e, ani tí da na'o ká ani ngú nanũ naha bhoko koko de, anga líli ziba mo-o de. I dũ la me 'ko ani nde akpi-e, ehe bini inde aní matá kpadji pi ani ngú naha bhoko koko ade. <sup>3</sup> Bhobhomũ-o apa me, i dũ me elø yie nũ ha bhoko koko me 'ko ani nde nga bha tété-e, líli apa me elø bhomũ-o akũnda bhoko gba kpála koko. I dũ la me 'ko ani nde akpi ma kpi-e, líli ne engú bini pí ani ade. Kaka-a, ani tí da naha bhoko koko. U pá li ani de me ani aha bhoko gba kpála koko-o de.

<sup>4</sup> A bhadi pi yi moko, ngayi ondaise ma. Yi akolo li pabilí gba líli maka okpála bhende amu, anga Yesu Kilisito akpi mada yi. Kaka-a, yi ibili

ne okpála ka ani, ngaani kpála inde li Ebhe azuku e-o. Ebhe amene mo-o ngubula me ní dũ azu pi ní onguwa na babadha. <sup>5</sup> Nedhinga ní adu nani akobho lie maka li osisiti gumu na kute ní adu atima ní lie, líli adu apana pi ní me, a inde-e siti 'ngú. La-a, ní dje mo-o, kute ní adu mangbo atima ní me ní mene osisiti 'ngú bhomu-o. Osisiti 'ngú ango-o adu atima ní ne kalanu ngú nazu nguwa inde ngatima kpála bhú kuo. <sup>6</sup> Engú bini, mbia inde-e, maka ní amu lie li pápá gba ehe inde a'o nako ní bhú bali-e amu-o, líli matá ne engú pí ní ade. Kaka-a, ní ti da namene kulu liní pi Ebhe li lele bhe na mbia. Ní améne kulu ango li kpadji gba Bu Bhobua , a adú matá li lele bhe na kalanu ní adu amene e sa líli inde u aye e maye-e de.

*Líli gba Ebhe-e asuno siti 'ngú gba ní-e mbámbá*

<sup>7</sup> I dũ mo-o, ní pa me líli ne ehe na sisiti? A mo-o ade! I dú ka líli de-e, ma de mbila siti 'ngú de. U yé nani bhú líli de me: «Mo odú ne gumu 'he gba kpála de-e», † ma de mbila de me nadu ne gumu 'he gba kpála ne siti 'ngú-o de. <sup>8</sup> Nedhinga ma ambila líli bhomu-o lie, siti 'ngú au kpadji e abhú ma. A tsia amba bhúla ma me ma dũ ne gumu ohe gba okpála ngangá. Padhá de, anga li líli dũ de-e, siti 'ngú kó angu e pí ma de. <sup>9</sup> Nani kalanu me ma nde mbila nga líli de-e, bua ma adu má bii! La-a, nedhinga ma ake mboli engú li Ebhe akunda e lie, siti 'ngú me ni ngani bhomu,

† 7:7 7:7 Tsia bhú Eki. 20:17; di ne bhú Det. 5:21.

10 ma atsia akpi. Lili inde li Ebhe aha e ngubula me aha mukobho pi okpála-a, aha naae muma nakpi. 11 Padhá de, anga ma ambila lili-e lie, siti 'ngú au kpadji e bhú ma. A apite bua ma, ma atsia akpi kaka.

12 Bhobhomu-o atima ní naziba me ndu lili-e hana ayie ka Ebhe, la di-e ndu ongu inde u aye e bhúbhú-o hana ayie ka ani. Ehe na sisiti bhúbhú belegu ade bini. 13 A akunda napa me ehe na babadha-a abhelo ma ngae? A mo-o ade! A abhelo mangbo ma ne siti 'ngú. Siti 'ngú-o aha lili, ani atsia abhelo ma nedi. A mene lie mo-o ngubula me okpála mbila me siti 'ngú bha ne siti 'ngú. Li kpadji gba lili-e, siti 'ngú atsia asuno la ibili me ni ane ne siti mane.

*Ngani okpála-kuti-e, ni ngagu gbele ne siti 'ngú inde abedhe bhú ni bedhe-o*

14 Ni mbila hana me lili-e ayie ka Ebhe. La ngama-a, ma ne kpála li angu nde bhú e ade, ma ne bali gba siti 'ngú. 15 Ma ngako mboli engu inde ma ngamene e ade. Padhá de, anga ma ngamene engu inde ma kunda namene e de. Ma mangbo ngamene bhende ma ayala namene e-o. 16 I du me ma nde ngamene engu inde ma ngayala e, bhobhomu-o asuno me ma abhuka me lili ne bádha 'he. 17 Bhobhomu-o apa me nedhinga ma ngamene siti 'ngú lie, a ko ma de, a ko mangbo siti 'ngú inde asi kuti e abhú ma ko. 18 Padhá de, anga ma ambila me bádha 'ngú si kuti e bhú ma de, a akunda napa me bhú kute ma, ngama kpála inde li angu nde bhú e ade-o. A na paká me a bhú ma ne gumu namene

bádha 'ngú, engú bini angu namemene la bhú ma ade. <sup>19</sup> Padhá de, anga bádha 'ngú inde ma akúnda namene e-e, ma ngamemene ade. Siti 'ngú inde ma ayala namene e-e, ma mangbo ngamene e. <sup>20</sup> Li ma dú amene engú inde ma akúnda namene e de-e, a kúnda napa me, a ko ma de, a ko mangbo siti 'ngú inde asì kùti e abhú ma-o.

<sup>21</sup> Í nde lie mo-o, engú ma ngau e ndú 'kpí hana ngae inde: ngama kpála inde ne gámú namene bádha 'ngú-o, a bha bini bhú ma ne angu namene siti 'ngú. <sup>22</sup> A li bua ma-a, ma ngakpi ndjili li líli gba Ebhe-o. <sup>23</sup> Engú bini, a bhú kute ma-a, ma ngau líli koko inde ngagu gbele ne líli inde li bua ma ngaziba e-o. Líli inde bhú kute ma-a nga'o ma bali gba líli na siti 'ngú inde abhú ma-o. <sup>24</sup> A ko likabhu mǎma! A agbégbé ma sakpa kute ma inde ngato ma li kpadji nakpi inde-e da? <sup>25</sup> Heni pí Ebhe li kpadji gba Yesu Kilisito, Ngámá gba ní-o!

Ma tí da nabu 'li ma me, li bua ma-a, ma ne bali gba líli gba Ebhe, engú bini, li kute ma-a, ma ne bali gba líli gba siti 'ngú.

## 8

### *Nadú bhú mukobho inde li Bu Bhobua aziba e*

<sup>1</sup> Mbia inde-e, engú na'o'o matá pí okpála inde akpetse lío bhú dabilì bini ne Yesu Kilisito ade.

<sup>2</sup> Padhá de, anga líli gba Bu Bhobua inde ngaha mukobho pí kpála li kpadji gba Yesu Kilisito agbegbe ma bhú bali gba líli na siti 'ngú bhú dabilì bini ne bali gba nakpi-e agbegbe. <sup>3</sup> Líli gba

Moidje ti nako da naha mukobho pi ní de, anga nganí okpála-kuti-e, angu bhú ní ngú namene olíli-e hana-a de. Engú bini, Ebhe amene ehe inde li líli-e ti nako da namene e de-o. Ngú na'e osisiti 'ngú gba ní-e, ani atima Ndili gba e makpe me ani go kobho maka ní osisiti okpála. Bhobhomu-o akunda napa me Ebhe kunda siti 'ngú inde li okpála ngamene e belegu de bini.

<sup>4</sup> Ebhe amene mo-o ngubula me nganí okpála inde ngakobho maka Bu Bhobua akunda lie, ní mene ndu 'ngú hana inde li líli-e aziba e, ní améne matá ongú maka li kute ní aziba lie de.

<sup>5</sup> Padhá de, anga mu du akobho nakpata ongú inde li kute mu aziba e, mu dú bha nabhundja engú na kute. Engú bini, mu du akobho nakpata ongú inde li Bu Bhobua akunda e-e, mu dú bhadi nabhundja ongú gba Bu Bhobua. <sup>6</sup> I du me mu nde ngabhundja bha bini pí ongú inde li kute mu akunda e-e, mu kpí. Engú bini, li mu du abhundja bha bini pí bhende li Bu Bhobua gba Ebhe-e ngakunda e, Ebhe méne me mu du bhú mukobho bhú dabili bini ne guo 'ngú .

<sup>7</sup> Okpála bhende ngabhundja bha bini ongú li kute o aziba e, a ko obhulu yala gba Ebhe. U ngamene líli gba Ebhe-e ade, u ti la di da namemene de. <sup>8</sup> Okpála bhende ngamene mo-o, u ti da nanga li Ebhe de.

<sup>9</sup> La ngayi-e, yi ngamene engú maka li kute yi aziba lie ade. Yi ngamene engú maka li Bu Bhobua aziba lie-o. Padhá de, anga Bu Bhobua gba Ebhe ngadu bhú yi. Kpála inde li Bua gba Ebhe-e ngadu bhú e ade-e, a ko makilisito de.

<sup>10</sup> Li Yesu Kilisito ɗu bhú yi-e, li pápá na kúte yi-e, yi amú mamu, anga yi nde amene siti 'ngú. La li pápá na bua yi-e, Bua gba ani-e ngaha mukobho pi yi, anga yi akolo ngbingbili bhú djila Ebhe.

<sup>11</sup> La di-e, li Bua gba Ebhe inde azuku nani Yesu bhú ká okpála inde amu-o ɗu bhú yi-e, a na paká me Ebhe bini bhomu-o ahá di mukobho pi okute yi na kukuo bhomu li kpadji gba Bua gba ani inde ngadu bhú yi-o.

<sup>12</sup> Kaka-a, ondaise ma, a ayo me ní ɗu akobho maka li Bu Bhobua akunda lie, a ayo de me ní ɗu akobho maka li kúte ní akunda lie de. <sup>13</sup> Padhá de, anga yi ɗu akobho maka li kúte yi makpe ngatima yi lie, yi mú. Engú bini, li Bu Bhobua teteke yi me yi 'o namene siti 'ngú na paká-a, yi sía mukobho. <sup>14</sup> Padhá de, anga ndu okpála hana inde ngadhuku maka li Bua gba Ebhe-e akunda lie, a ko ongisi gba Ebhe.

<sup>15</sup> Bu Bhobua inde li Ebhe aha e pi yi-e nga'o yi bhú bali ade, ani di ngabedhe matá yi ne tsulu ade. A ko mangbo Bua inde ngamene me yi kolo ongisi gba Ebhe. Ka angu gba Bua bhomu-o, ní ti da nagama 'ngú pi Ebhe ne na'i ani me: «Aba, 'Dyi ya!» <sup>16</sup> Bua gba Ebhe-e belegu ngapapa ngae makpe pi ní abhú ní me ní ne ongisi gba Ebhe. <sup>17</sup> Ní ne ongisi gba ani-e na paká. A akunda napa me ní asía obabadha 'ngú inde li Ebhe apa me ni ahá e pi ní-e masia. Ní asía obabadha 'ngú bhomu-o nganí bhú dabili bini ne Yesu Kilisito. Maka ní ngazu likabhu lie bhú dabili bini ne ani-e, ní adú bhadi bhú dabili bini ne ani li bili gba ani na sangu-o .

*Sangu inde ní nga'o 'to ní 'to e-o*

<sup>18</sup> Ma ambila na paká me olikabhu ní ngazụ e mbia inde-e kpo 'ndji e ne sangu inde li Ebhe ambámba galikpe 'ta e pi ní-e belegu de bini.

<sup>19</sup> Padhá de, anga ndu 'he inde li Ebhe abho e hana ngadjeke ne gugumu hana ekpí inde li Ebhe asúno lie mbámbá me okukulụ ongisi gba ni-e ngao dho. <sup>20</sup> Padhá de, anga ndu 'he inde li Ebhe abho e hana ati sakpa angu na padhá. A ko de me ohe bhomu-o akunda ngao-o de, a ko mangbo anga Ebhe ato uo sa angu bhomu-o ngae. Engú bini, ohe li Ebhe abho e ti da na'o nga matá 'to e 'to engú bini. <sup>21</sup> Engú ang-o me, ekpí akólo makolo li Ebhe tsía gbégbe bhú bali gba kuo ndu ohe inde ani abho e hana. U kpí matá-a de, u asia sangu maka ongisi gba Ebhe-o.

<sup>22</sup> Ní mbila hana me nayie nani aoo, nakolo pi mbia inde-e, ndu ohe li Ebhe abho e hana-a, ngazụ likabhu, u di ngazụ tate o maka elə inde li bhú 'bu e nde ngazụ ka ezu. <sup>23</sup> Ohe inde li Ebhe abho e bha bini ngazụ likabhu kpi e kpi ade, abana nganí okpála inde asia Bu Bhobua maka gina 'he inde li Ebhe aha e pi ní-e, ní di ngazụ likabhu. Ní ngazụ likabhu ali bua ní nedhinga ní ngadjeke lie me Ebhe mene me ní kolo ongisi gba ni, amba ani gbegbe la di ní libhomu bhú bali. <sup>24</sup> Ebhe akobho nani ní akobho, ní u nga la sangu ang-o de, ní bha nga'o 'to ní toto. Li ní du au ongú inde ní nga'o 'to ní 'to e ne djila ní-e, a bhomu-o matá na'o 'to o 'to 'ngú de, anga a nde sakpa ní. Padhá de, anga kpála 'o'o 'to e 'to ehe inde ani au e ne djila e au-o de. <sup>25</sup> Engú bini, i

du me ní nde u nga ehe inde ní nga'o 'to ní 'to e de-e, ní dú nadjedjeke ne 'ndjá bua.

<sup>26</sup> Engú koko di ngae inde, Bu Bhobua ngateteke ní li kpadji gba Ebhe-o, anga angu nde bhú ní ade. Padhá de, anga ní mbila nayo Ebhe li lelele de. Bu Bhobua mangbo ngayo Ebhe mada ní ngae makpe. Aní ngayo Ebhe ne bua e hana da napa me u ti da napapa ne ebhø de.

<sup>27</sup> Ebhe mbila ndu 'ngú hana inde bhú kpála. Aní ngambila di engú inde li Bu Bhobua ngakunda napa e hana. Padhá de, anga Bu Bhobua ngayo Ebhe mada omaha Ebhe maka li Ebhe akunda lie ngae.

<sup>28</sup> Ní mbila hana me ndu 'ngú li Bu Bhobua ngamene e hana-a, aní ngamemene ngubula me okpála bhende ne mukunda pi Ebhe-e sia bádha 'ngú. A ko okpála inde li Ebhe a'i nani o me u mene engú inde ni akunda e. <sup>29</sup> Padhá de, anga Ebhe abhu nani uo kalanu, aní atsia apa di kalanu me ni améne me u kolo maka Ndili gba ni, ngubula me Ndili gba ni-e du ne gina 'zu bhú ká ongisi bhelé. <sup>30</sup> Obhe li Ebhe amene engú bhomu-o pi o-o, aní a'i di uo. Obhe aní a'i o-o, aní amene di me u kolo bhú djila ni okpála na ngbingbili. Obhe aní amene me u kolo bhú djila ni okpála na ngbingbili-e, aní amene di me u sia sangu gba ni-o.

*Ehe bini gbó bhusu ní ne mukunda li Ebhe nde ne e pi ní-e de*

<sup>31</sup> Nakpata ndu 'ngú bhomu-o hana-a, ya ti da nabu tata-a me: «Li Ebhe nde lie pi ní-e, kpála bini ti da naha angu ní de.» <sup>32</sup> Ngaani Ebhe-e,



ani gili Ndili gba e makpe pi ní de. Ani apu ani ngú napa me ani go kpi pi ndu ní hana. Maka ani apu Ndili gba e lie pi ní-e, ani ahá di ondu 'he koko-o hana pi ní bhú bádha bhú 'bu gba e-o. <sup>33</sup> Kpála bini ne engú napa mapa li okpála li Ebhe abhu o ade. Padhá de, anga Ebhe ngae makpe au uo me u bhú djila ni ngbingbili.

<sup>34</sup> Kpála bini ti da na'o 'ngú pí okpála li Ebhe abhu o de. Padhá de, anga Yesu Kilisito ngae makpe akpi pi ní. Pépé-e, ani azuku, ani ali li pá 'kpa na kokpa gba Ebhe. Ani di ngayo Ebhe ngubula ní. <sup>35</sup> A ti da nagbo bhusu ní ne mukunda li Yesu Kilisito nde ne e pi ní-e da? Abana ní du bhú likabhu, abana ní du bhú kpéke da 'ngú, abana li okpála du nato mbolo li ní, abana ní du bhú ndibhili, abana li kpéke 'ngú du nago ngú ní, abana li okpála du nakodho ngulu ní, abana li gumu du namene ní, ehe bini inde ayóko mukunda li Yesu Kilisito nde ne e pi ní-e belegu ade bini. <sup>36</sup> A maka u aye lie bhú bhuku gba Ebhe-e me:

«Okpála ngagili ndu 'kpí hana me o bhøle ya kabula 'ngú gba mu-o.

Okpála ngau ya mugito me ya ne okandøle inde u adjí abhili o.†»

<sup>37</sup> La bhú ndu 'ngú bhomu-o hana-a, ya ngaha angu ndu ongu bhomu-o hana ka angu gba kpála inde ne mukunda pi ya-o. <sup>38</sup> Padhá de, anga ma ambila na paká me ehe bini inde agbo bhusu ní ne mukunda li Yesu Kilisito nde ne e pi ní-e

† 8:36 8:36 Tsia bhú Ets. 44:23.

ade. Abana i dɛ me ní nde bhú mukobho, abana i dɛ me ní nde amu, a viti bha bini. Abana i dɛ oandjelu , abana i dɛ di ongú na bití, abana ongú na naki, abana ongú inde ngago, bini bhú káká-a gbó bhɛsɛ ní ne mukunda gba Yesu Kilisito de. <sup>39</sup> Abana i dɛ ohe inde ngadɛ abhúlá, abana ohe bhende ngadɛ asa doto, abana ndɛ ohe koko hana inde lí Ebhe abho e, ehe bini ade inde i tí da nagbo bhɛsɛ ní ne mukunda inde lí Ebhe nde ne e pí ní lí kpadji gba Yesu Kilisito, Ngámá gba ní-o.

## 9

### *Ebhe ngamene ndɛ 'ngú hana bhú ngu e*

<sup>1</sup> Ma ne kpála gba Yesu Kilisito ! Engú ma adjí apa e inde-e, a ko kúkulu 'ngú, ma pa eu de. Bu Bhobua ngasuno mɛma me 'lí ma-a, a ko paká, bua nakpokpo kú 'ngú gba ma la bhadi ngaziziba moko me a ko paká. <sup>2</sup> A ko paká me bua ma ne líkabhu naali, líkabhu inde lí bua ma-a ndjindjia di-i de. <sup>3</sup> Lí kpadji dú uu-o, ngama makpe, ma de ayó me Ebhe tɛ pɛdjɛ lí ma, amba aní gbo bhɛsɛ ya ne Yesu Kilisito i dɛ me a nde tí da nateteke ondaise ma omaYuda u-o, anga a ko ondaise ma na piga. <sup>4</sup> A ko okpála na piga gba Isalaele. Ebhe abhɛ uo me u kolo ongisi gba ní, aní aha pí uo me u u sangu gba ní-o, aní akodho gandja ne uo bhɛtsibhɛtsi, aní aha lílí gba e pí uo, aní asuno lele nayo pí uo, aní apa me ní améne obabadha 'ngú pí uo. <sup>5</sup> A ko odi Abalahama ne ongisi gba e-o. La di-e Yesu Kilisito ngae makpe lí pápá na kɛte-e, a ko kpála na piga gba uo. Ngaani,

a ko Ebhe inde pí 'ndji ndu 'he hana-o. A ayo me okpála toko ani duduuma ne duduuma. A adu moko.

<sup>6</sup> Ma pa de me engú li Ebhe apa me ni améne e, aneke de. Ní mbila hana me a ko de me ndu odi Isalaele hana bha ne ongisi gba ani makpe-e de. <sup>7</sup> La di-e, ndu odi Abalahama hana bha ne ndu ongisi gba ani makpe ade. Padhá de, anga Ebhe apa pí Abalahama me: «Odi mu akóto li kpadji gba Isaka.†» <sup>8</sup> A akunda napa me ndu ongisi li Abalahama azu o hana ne ongisi gba Ebhe ade. Pi Ebhe-e, kukulu odi Abalahama bha bini ne ongisi inde ani azu o nakpata lele maka li Ebhe apa nani lie me ni ahá pí ani-o. <sup>9</sup> Padhá de, anga Ebhe apa nani engú na ongisi ango-o pí ani me: «Bhú kalanga na sidi-e, bhú ngua onedhinga inde-e, ma agie matá lima, ma abháka me Sala nde azu ndili na bhobhoko.†»

<sup>10</sup> A viti bhadi bini ne bhe gba Lebeka-o. Ndu ongisi gba ani-e bhisi hana, koli 'dyi uo bha bini, ogbi ní Isaka. <sup>11-12</sup> La-a, kala napa me u zu uo-o, Ebhe apa me: «Bhebhele-e adú kpála na kulu gba ndindili-o.†» Ebhe apa 'ngú bhomu-o kala me suka uo mene bádha 'ngú, i du di-e siti 'ngú. Lebeka nde zu nga uo de. Ebhe amene mo-o ngú nasuno me ni memene bha bini engú maka ni akunda lie. Ani ngabhu okpála bha bhú ngu e. Ani tsia de me kpála ango-o amene bádha 'ngú ne me ani amene siti 'ngú-o de. <sup>13</sup> A maka u aye lie bhú bhuku gba Ebhe-e me Ebhe apa me:

† 9:7 9:7 Tsia bhú Dje. 21:12. † 9:9 9:9 Tsia bhú Dje. 18:10-14.

† 9:11-12 9:11-12 Tsia bhú Dje. 25:23.

«Ma ne mukunda pi Yakobho, ma ayala Esau.†»

14 I du me a nde mo-o, ní pá me ngbili 'ngú bhú Ebhe adi? Belegu de bini! 15 Padhá de, anga Ebhe apa pi Moidje me:

«Ma kunda namene bádha 'ngú pi kpála-a,  
ma méne.

I du di me ma nde akunda nadje ndjinga kpála-a,  
ma djé.†»

16 Bhobhomu-o akunda napa me, li Ebhe mene bádha 'ngú pi kpála-a, ani amene bha pi ani anga ani adje ndjinga ani. A ko de me ani amene pi ani anga kpála ang-o akunda ngae, ne me ani amene tété kulu-o de. 17 A maka engú inde ani apa nani e bhú Bhuku gba e pi 'ngbé ngámá na Edjipito me: «Ma a'o mu 'ngbé ngámá ngubula me ngama Ebhe-e ma pana angu gba ma bhú mu, di ne ngubula me ndu okpála na píla doto libhomu mbila me ma ne da-ie.†» 18 Kaka-a, ní ngau me li Ebhe kunda nadje ndjinga kpála-a, ani djé, ani kunda nato kpéke 'ndji bhú 'ndji kpála-a, ani tó.

### *Ní ti da nadjidji 'ngú sa 'li Ebhe de*

19 Nedhinga koko-o, kpála bini ti da nayi ma me: «Li Ebhe dú nabhu okpála maka ani akunda lie, ka ni ani nde lie nga'o 'ngú pí okpála, u nde bha ngamene bhomu-o bhende ani akata uo me u mene e?» 20 Ngamu kpála inde ngayi ma mo-o, mu ne da ngú nadjidji 'ngú sa 'li Ebhe? Madakpa ti da nayi kpála inde apo ani-e uu me:

† 9:13 9:13 Tsia bhú Mal. 1:2-3. † 9:15 9:15 Tsia bhú Eki. 33:19. † 9:17 9:17 Tsia bhú Eki. 9:16.

«Mo omene ma me-e ka ni?» Belegu de bini!†  
 21 Bhuḷu napo lusa ti da namene engú inde ani akunda e ne doto na lusa-a hana. Ani ti da nagbo bhusu doto na lusa-a bhisi. Ani há bhe bini-e, ani méne tété lusa na kpéke mase, ani há bhe koko-o, ani méne tété lusa u amemene kulu ne e ndu 'kpí hana.

22 Li Ebhe kunda nadu maka bhuḷu napo lusa-a, naamu bhúbhú ne ni? Ani amene mo-o ngubula nasuno ke 'ngú gba e, di ne me a bhú ni ne angu. La-a, ani akibila nani ne 'ndjá bua okpála inde a ayo nani me u sia ke 'ngú gba ani-o, inde adu nako masikpe de napa me ani bhili o-o.

23 Ebhe amene mo-o ngubula me okpála mbila me sangu abedhe bhú ni bedhe pi okpála inde ni nde ne ndjinga pi o-o. Ani aleke uo kalanu me u sia sangu gba ni-o. 24 Ní di ne okpála inde ani a'i o pi e. Ani bhu bha bini okpála ani a'i o pi e bhú ká omaYuda de, ani abhu di uo bhú ká opiga inde ne omaYuda ade-e uu. 25 A bhomu-o engú ani apa e bhú bhuku gba polofeta Oze me:

«Okpála inde nani i du okpála ka ma de-e,  
 ma a'í uo me a ko okpála ka ma.

Okpála inde nani ma du ne mukunda pi o de-e,  
 ma apa me ma ne mukunda pi uo.†

26 Li bili nako ma apa pi uo lie me:

<Ngayi-e, yi ne okpála ka ma ade-e>,  
 bha li bili bini bhomu-o, ma apa pi uo me:

<Yi ne ongisi gba ma, Ebhe na mukobho-o.†>»

† 9:20 9:20 Tsia bhú Isa. 29:16, 45:9. † 9:25 9:25 Tsia bhú Oz. 2:25. † 9:26 9:26 Tsia bhú Oz. 2:1.

27 La pi okpála na Isalaele-e, polofeta Isaya agama di 'ngú li 'ngú gba uo-o. Aní atsia apa me: «Abana li omaIsalaele dɔ bha bhelé maka sike abhú 'ngbé 'ngu-o, yi mbila me obhe li Ebhe akóbho o-o bhelé ade. 28 Padhá de, anga engú li Ebhe apa me ní améne e píla doto-o, aní améne bha hana má kpəkəbhə! Aní améne la di má gala!†» 29 A di maka polofeta Isaya apa matá nani lie me:

«Li Ebhe Ngámá Apí 'Kpí bhíli nani  
ongisi gba ní-e hana-a,  
ní de andjulu maka okpála na Sodomo ne Gomo-  
molo  
andjulu nani lie-o.†»

*Okpála koko bhú ká omaIsalaele bhuka de*

30 I dɔ mo-o, ní ti da nabu tata pi? Engú inde ya akunda nabu tata ne e ngae inde, okpála inde bhú piga gba omaIsalaele ade-e, gili nako nadu ngbingbili kala Ebhe de. La-a, Ebhe au uo me a ko okpála na ngbingbili bhú djila e ka u abhuka ní lie-o. 31 La-a, okpála na Isalaele inde adu agili me o kolo ngbingbili bhú djila Ebhe li kpadji namene líli-e, kolo nedi ali soso de. 32 U kolo nedi ali soso de ka ní? U kolo de, anga u adu abhundja me o kólo ngbingbili bhú djila Ebhe ka okulu gba o-o. U dɔ abhuka de me kpála ngakolo ngbingbili bhú djila Ebhe ka nabhuka gba e de. U atsia ado 'dhu o li teme inde ngagbo 'i kpála-o. 33 Bhuku gba Ebhe-e ngapa 'ngú na teme ango-o me:  
«Yi gbo 'dje yi!

† 9:28 9:28 Tsia bhú Isa. 10:22-23. † 9:29 9:29 Tsia bhú Isa. 1:9.

Ma nga'o bhú gũdhu na Siona teme bini inde li okpála ngado 'dhu o lie.

A ko teme inde ngagbo 'i kpála.

La-a, kpála abhuka ani-e,

ani djí 'ngbu e li ani 'kpá bini de.†»

## 10

<sup>1</sup> Ondaise ma, engú inde ma ngakũnda e ne bua ma hana-a, a ko me omafsalaele sia mukobho. Ma ngayo Ebhe pi uo ngánga. <sup>2</sup> Ma au me u akũnda namene kulu lio pi Ebhe na paká. Engú bini, u mbila kpadji ango-o de. <sup>3</sup> U mbila kpadji li Ebhe ngau kpála li e bhú djila e ngbingbili-e de. U agili nade kpadji bhe gba o ngao makpe. Kaka-a, u ayala nakpata kpadji li Ebhe ngau kpála li e bhú djila e ngbingbili-o. <sup>4</sup> Padhá de, anga li Yesu Kilisito ago lie, ani andjia angu líli gba Moidje-o. Ani amene mo-o ngubula me ndu okpála hana inde abhuka ni-e kolo ngbingbili bhú djila Ebhe.

*Ebhe ngakobho ndu okpála hana inde abhuka Yesu*

<sup>5</sup> Moidje aye engú pindji lele maka li Ebhe ngau okpála lie bhú djila e ngbingbili ka nakpata líli-o. Ani me: «Kpála inde akpáta ndu líli-e hana-a, adú bhadi bhú mukobho kaka.†» <sup>6</sup> Engú bini, u papa pindji lele maka li Ebhe ngau okpála lie bhú djila e ngbingbili ka nabhuka me: «Mo opá li bua mu de me: <A a'ú abhúlá da?†>» Padhá de, anga li mu pa mo-o, a akũnda napa me, mu ngayi li

† **9:33** 9:33 Tsia bhú Isa. 8:14-15, 28:16. † **10:5** 10:5 Tsia bhú Lev. 18:5. † **10:6** 10:6 Tsia bhú Det. 30:13.

bua mụ me: «A a'ú abhúlá da ngú napa pi Yesu Kilisito me aní go bhaka ní kuto ei.» <sup>7</sup> Mo opá di li bua mụ de me: «A aké asatè da?» Padhá de, anga li mụ pa mo-o, a akúnda napa me, mụ ngayi li bua mụ me: «A aké asatè da ngú nagbegbe Yesu Kilisito bhú ká okpála inde amu-o?†» <sup>8</sup> Bhuku gba Ebhe-e apa mangbo me: «'Li Ebhe dengo mụ masikpe.

A bhú 'bhè mụ, a di li bua mụ.†»

Engú ya ngakpokpo e-e, a pindji eli bhomu, a ayo me okpála bhuka eli ango-o. <sup>9</sup> Li mụ pa ne 'bhè mụ kala ndu okpála hana me Yesu ne Ngámá-a, li mụ bhuka di ne bua bini me Ebhe azuku aní bhú ká okpála inde amu-o, Ebhe kóbho mụ. <sup>10</sup> Padhá de, anga ní bhuka Yesu Kilisito li bua ní-e, ní kólo ngbingbili bhú djila Ebhe. Ní pa ne 'bhè ní mbámhá me Yesu Kilisito ne Ngámá-a, Ebhe kóbho ní. <sup>11</sup> A maka u aye lie bhú Bhuku gba Ebhe-e me: «Ndu okpála hana inde abhuka ani-e, aní djí 'ngbu e li uo 'kpí bini de.†» <sup>12</sup> Ka 'ngú ango-o, abana omaYuda, abana di okpála bhende ne omaYuda ade-e, u viti bha bini. Koli Ngámá gba uo bha bini. Aní ngaha obabadha 'ngú gba e bhelé pi ndu okpála hana inde ngayo ka aní me aní teteke o-o. <sup>13</sup> A maka u aye lie bhú Bhuku gba Ebhe-e me: «Ndu okpála hana inde ayó ka Ebhe Ngámá me aní teteke o-o, aní akóbho uo makobho.†»

<sup>14</sup> A moko. Engú bini, li okpála bhuka aní de-e, u ayó aní lele pi? Li okpála dje engú gba ani-

---

† **10:7** 10:7 Tsia bhú Det. 30:13. † **10:8** 10:8 Tsia bhú Det. 30:14. † **10:11** 10:11 Tsia bhú Isa. 28:16. † **10:13** 10:13 Tsia bhú Djl. 3:5.



e de-e, u abhúka ani lele pi? Li kpála kpokpo 'ngú gba ani-e de-e, okpála adjé engú gba ani-e lele pi? <sup>15</sup> Li ani tima okpála de-e, u anú nakpokpo 'ngú gba ani-e lele pi? U aye di bhú Bhuku gba ani-e me: «Tsitsia nga, a ko djali nau okpála inde ngakpokpo obabadha ngali-e nago ne kpokpokpo!†» <sup>16</sup> Engú bini, a ko de me ndu okpála hana abhuka Bádha Ngali-e de. Padhá de, anga Isaya ayi nani belegu me: «Ngámá, a abhuka ongali ya akpokpo e pi okpála da?†» <sup>17</sup> Ní mbila me, kpála ngabhuka nedhinga inde ani adje ngali lie-ò. Ngali bhomu-o, a ko bhende ngalu pí 'li Yesu Kilisito-o.

<sup>18</sup> † nde lie mo-o, ma ngayi me, a akunda napa me omaYuda dje nga ngali bhomu-o di? A mo-o ade, u adje! Bhuku gba Ebhe-e ngapa me: «Ngbikpi ne sukpe u ngakpokpo 'li Ebhe ne ndu bili hana píla doto.

'Li uo akolo ne li ndu 'dje doto badha hana.†»

<sup>19</sup> Ma ngayi matá engú bini, okpála na Isalaele kə mboli engú u adje e di? A mo-o ade, u akə mbolimboli akə! Ngaiza kalanu-o, Moidje apa nani me:

«Ebhe apa me:

◁Ma améne engú da napa me

ngayi okpála gba ma-a yi kolo ne siti

bua pi okpála inde ne

okpála gba ma ade-o.

Ma améne engú da napa me yi kolo ne ke 'ngú pi

---

† **10:15** 10:15 Tsia bhú Isa. 52:7. † **10:16** 10:16 Tsia bhú Isa. 53:1. † **10:18** 10:18 Tsia bhú Ets. 19:5.

opiga inde li imbilangu  
nde bhú 'ndji o ade-o.†»

<sup>20</sup> Pipita-a, polofeta Isaya apa belegu me:

«Ebhe apa me:

«Okpála inde i du agili ma de-e, au ma.

Ma asuno lima pi okpála inde  
i du ayo ma de-o.†»

<sup>21</sup> La li 'ngú gba omaɬsalaele-e, Ebhe apa me:

«Ekpí libhomu, ma ato 'kpa ma pi omaha ma me  
u gogo,

engú bini, u amene kpéke 'ndji,  
u ayala engú inde ma adu napa e-o.†»

## 11

### *Ebhe ne ndjinga pi omaɬsalaele*

<sup>1</sup> Ma ngayi me, i nde lie mo-o, Ebhe abala omaha e abala? A mo-o ade! Padhá de, anga ngama makpe-e, ma ne maɬsalaele. Abalahama ne ogbi ma, u azu ma bhú piga gba Bendjame.

<sup>2</sup> Ebhe bala omaha e inde ani abhu nani o pi e bhutode-e de. Yi mbila engú inde li Bhuku gba Ebhe apa e hana li bili inde li polofeta Eliya adu alopole lie lie kala Ebhe li 'ngú gba okpála na Isalaele-o. <sup>3</sup> Eliya adu alopole lie me: «Ngámá, u abhili opolofeta gba mu-o. U atsia agugumu di odabili inde ya tsutsulu 'he pi mu pí e-o. Ma atigala bha koli ma kpi ma kpi. U la bhadi ngagili nabhele ma.†»

---

† **10:19** 10:19 Tsia bhú Det. 32:21. † **10:20** 10:20 Tsia bhú Isa. 65:1. † **10:21** 10:21 Tsia bhú Isa. 65:1-2. † **11:3** 11:3 Tsia bhú 1 Ong. 19:10, 14.

<sup>4</sup> Ebhe atsia agie pi ani pi? Ebhe agie pi ani me: «A mo-o ade, m̄ kpi m̄ kpi ade. Ma alila okpála ket̄e mananika pi ma makpe. U tutu lipaku o kala Bala inde li okpála ngau e maka Ebhe-e de.†»

<sup>5</sup> Bhú okpí na naki inde-e, a bhadi moko. Dú omaɪsalaele koko atigala, inde li Ebhe abh̄u o pi e ka bádha bhú 'bu gba e-o. <sup>6</sup> Ani bh̄u uo ka babadha okulu gba uo de, ani abh̄u uo ka bádha bhú 'bu gba e-o. Li Ebhe bhú uo ka obabadha okulu gba uo-o, ní de apá me bádha bhú 'bu gba ani-e, a ko bádha bhú 'bu de.

<sup>7</sup> Bhobhom̄-o akunda napa me okpála na ɪsalaele sia ehe inde u adu nagili e de. Okpála bini bini bhú ká uo inde li Ebhe abh̄u o-o asia ehe inde u adu nagili e bha bini ngao. La pi okpála koko-o, Ebhe ato kpéke 'ndji bhú uo. <sup>8</sup> A maka u aye lie bhú Bhuku gba Ebhe-e me:

«Ebhe amene me u akó mboli 'ngá bini de.

Ani ani djila uo me u aú kpí de.

Ani atsia abuku di 'dje uo me u adjé 'kpí de nakolo pi naki.†»

<sup>9</sup> Davidi atu di nani 'kpa e li uo me:

«Oanokomia gba uo du pi uo maka ekú,

a adú pi uo maka ndjukudu li kpadji,

amba u sia mbini kulu inde u ngamene e-o.

<sup>10</sup> A ayo me Ebhe dudu djila uo me u aú 'kpí de.

A ayo me Ebhe ha likabhu pi uo, me 'ngbu uo kodho.†»

<sup>11</sup> Ma atsia ayi matá me, li okpála na ɪsalaele ati lie, u ati bha na paká-a? A mo-o ade! Engú

---

† 11:4 11:4 Tsia bhú 1 Ong. 19:18. † 11:8 11:8 Tsia bhú Det. 29:3; di ne bhú ɪsa. 6:10, 29:10. † 11:10 11:9-10 Tsia bhú Ets. 69:23-24.

bini, ka u ati lie, okpála inde ne omaɓsalaele ade atsia asia mukobho. Ebhe amene mo-o ngubula napa me omaɓsalaele du ne siti bua li okpála inde ne omaɓsalaele ade-o. <sup>12</sup> Li omaɓsalaele amene siti 'ngú lie, Ebhe amene bádha 'ngú pi ndu okpála na doto hana. Li omaɓsalaele ati lie, Ebhe aha tia pi okpála inde ne omaɓsalaele ade-o. I du me Ebhe nde amene bádha 'ngú pi ndu okpála na doto hana nedhinga inde li omaɓsalaele andjo 'li ani lie, ani améne la matá bádha 'ngú pi uo ane mane, nedhinga li ndu omaɓsalaele hana agie lio lie li pápá gba ani-o.

*Lele maka li Ebhe akobho okpála inde ne omaYuda ade-e lie-o*

<sup>13</sup> Mbia inde-e, ma ngagama 'ngú inde-e pi yi okpála inde ne omaYuda ade-o. Ma ne bhulu titima inde li Ebhe atima e pi okpála inde ne omaYuda ade-o. Kaka-a, ma ngau kulu inde li Ebhe aha e muma ne tata. <sup>14</sup> Ka ma ngau kulu ango-o lie ne tata-a, ma abhundja me okpála na piga gba ma-a adjé siti bua li ma tété, li Ebhe tsia kóbho di bini bini bhú ká uo. <sup>15</sup> Li Ebhe abala omaYuda lie, okpála na opiga koko atsia apo bhúla o de ani. Li Ebhe ató guo 'ngú sunda o ne omaYuda lie, adú djali na ngbéngbé. A adú maka kpála inde akoto bhú kuo, ani atsia agie lie bhú mukobho!

<sup>16</sup> I du me u nde aha ndu mapa na kalanu-o pi Ebhe-e, a akunda napa me mapa bhomu-o libhomu ne naani. Li u ha sie ndula pi Ebhe-e, a akunda napa me oyáyá-a hana di ne naani.

<sup>17</sup> Okpála na ɓsalaele maka 'lá ndula na olive.

Ebhe ava oyáyá bini bini. Aní atsia ato yi, opiga koko inde ne omaYuda ade-e, bhú da oyáyá bhomu-o. Obabadha ohe inde li omaYuda adu asia e-e, ngayi omatobhukayi-e, yi di ngasisia maka li oyá ndula asisia angu lie ka sie e-o.

<sup>18</sup> Kaka-a, a ayo de me yi u okpála inde maka oyá ndula inde u ava e padhá-a de. Yi nga'o liyi ne bhúlá ka ni? Sie ndula-a dha bhú yá e de, yá ndula adha mangbo bhú sie ndula ko. <sup>19</sup> Eu ade. Mu ti da napa me: «Ebhe ava nani oyáyá bhomu-o ngubula napa me, ngama-a, aní to ma mada uo-o.» <sup>20</sup> A ko paká me, Ebhe ava nani uo anga u bhuka nani aní de. Mo osia dabili bhomu-o anga mo obhuka aní. Engú bini, mo o'ó limu kaka abhúlá naali de. Du mangbo ne tsulu Ebhe. <sup>21</sup> Padhá de, anga Ebhe va nani omaYuda padhá de, a asi la masi maka mu. OmaYuda la nani ne okukulú oyá ndula na olive ngao. Mu lila limu de-e, Ebhe akódho bhadi mu maka aní ava uo lie-o. <sup>22</sup> Mbila me Ebhe babadha, aní la di ngakodho 'ngú gba okpála ngbingbili. Aní ngakodho 'ngú gba okpála bhende nga'o ká kpadji gba aní-o. Aní la babadha li pápá gba mu-o. La-a, a ayo me nu bha li kpadji gba aní-e ne kalanu. I du mo-o de-e, aní akódho di mu maka aní ava oyá ndula koko lie-o.

<sup>23</sup> La pi omaYuda-a, i du me u nde a'o kpéke 'ndji gba o-o, Ebhe gie matá uo li bili u adu nako lie-o. Padhá de, anga Ebhe ne angu ngú nagie uo matá bhú da o ne toto. <sup>24</sup> Ngayi okpála inde ne omaYuda ade-e, yi maka oyá ndula na olive inde u lu e malu de. Ebhe atsia ava yi, aní ago a'o yi li

kute 'lá olive bhende u alu e malu. U memene la mo-o de. La pi omaYuda-a, uo maka oyá ndula na olive bhe u a lu e malu. Kaka-a, dá napa me Ebhe gie uo bhú dá o-o kpekepeke ade.

*Ndjinga gba Ebhe-e pi ndu okpála hana*

<sup>25</sup> Ondaise ma, ma akunda me yi mbila engú inde li Ebhe awo e mawo-o, ngubula me yi aú liyi mágito de me yi ne obhulú imbilangu-o de. Yi mbila me té okpála na Isalaele adú nagbe kpéke 'ndji li 'ngú gba Ebhe-o, nakolo li 'kpí inde li ndu okpála inde ne omaYuda ade-e hana agié lio lie agba Ebhe-o. <sup>26</sup> Abhomu-o li 'kpí ango-o, li omaIsalaele hana tsia kóbho maka li Bhuku gba Ebhe-e apa lie me:

«Kpála inde akóbho okpála ayíe bhú Siona .

Ani a'é osisiti 'ngú gba odi Yakobho.

<sup>27</sup> A bhomu-o gandja inde ya akódho e ne uo-o, nedhinga ma a'é osisiti 'ngú gba uo lie-o.†»

<sup>28</sup> Li ní tsia maka li omaYuda ayala Bádha Ngali-e lie, a ko obhulú yala gba Ebhe. Engú bhomu-o amene lie lie mo-o, ngayi okpála inde ne omaYuda ade-e, yi atsia asia bádha 'ngú gba Ebhe-o. Engú bini, ní tsia maka li Ebhe abhu uo lie me u du bhú ngu ni-e, Ebhe ndu 'kpí hana ne makunda pi uo ka gandja nani u akodho e ne onguo ogbi uo mo-o. <sup>29</sup> Padhá de, anga li Ebhe ha 'he pi kpála-a, ani gbúlú matá ka ani de. Ani 'i di kpála-a, ani dji matá mabhundja gba e li pabili gba ani-e de. <sup>30</sup> Nani kalanu-o, ngayi di-e, yi andjo 'li Ebhe. Engú bini mbia inde-e, yi

† **11:27** 11:26-27 Tsia bhú Isa. 59:20-21, 27:9.

ambila ndjinga gba Ebhe anga omaYuda andjo di 'li ani. <sup>31</sup> A bhadi moko. U andjo bhadi 'li Ebhe mbia inde-e ngubula me Ebhe dje ndjinga yi. Ebhe amene mo-o ngubula me ngauo di-e ni dje ndjinga uo mbia inde. <sup>32</sup> Padhá de, anga ka li ndu okpála hana andjo 'li Ebhe lie, u akolo maka obhulu tikpu. Ebhe amene mo-o ngubula me ni dje ndjinga ndu uo hana.

*Ebhe ngbéngbé ane ndu 'he hana*

<sup>33</sup> A na paká me bádha bhú 'bu gba Ebhe ane ne engbé mane! Imbilangu gba ani-e ane ndu 'ngú hana! Ani mbila ndu 'ngú hana! Engú inde ani ngabhundja e li bua e, kpála bini ti da nakpokpo kúkú de. Kpála bini ti da nakə mboli okpadji gba ani-e de. <sup>34</sup> A maka u aye lie bhú Bhuku gba ani-e me:

«Kpála bini mbila mabhundja gba Ebhe Ngámá-a de.

Kpála bini ade inde i ti da nakpokpo pi Ebhe lele engú inde ayo me ani mene e-o.†

<sup>35</sup> Kpála bini ade inde akpo naha 'he pi Ebhe ngubula napa me ani du adjeke

me Ebhe gie pi ni-o.†»

<sup>36</sup> Padhá de, anga ani abho ndu 'he hana ngae. Ani ngamene me ndu 'he ni abho e hana du bhú makobho. Ndundu hana ngagie lie agba ani. A ayo me okpála dhəgə Ebhe duduama ne duduama! A adu moko.

---

† **11:34** 11:34 Tsia bhú İsa. 40:13. † **11:35** 11:34-35 Tsia bhú İsa. 40:13; di ne bhú Dj. 41:3.

## 12

### *Ebhe aha kulu pi okpála kpikpikpi*

<sup>1</sup> Ondaise ma, i nde lie me Ebhe nde adje ndjinga ní mo-o, ma ayo ka yi me yi ha liyi ngayi makpe pi Ebhe maka makiso inde na uu. Yi du libhomu pi ani ngú nanga li ani. Pi yi-e, a bhomu-o kukulu lele nadhogø Ebhe-o. <sup>2</sup> Yi adú amene 'he maka okpála na doto inde-e de. Yi 'o mangbo me Ebhe dji yi, amba ani ha pi yi imbilangú na mbia. Yi mene mo-o, yi tsia mbíla me Ebhe akúnda ní i-e. A akúnda napa me yi ambíla engú inde na babadha, engú inde anga li ani, engú inde li kpadji.

<sup>3</sup> Kabula kulu inde li Ebhe aha e muma ka bádha bhú 'bu gba e-e, ma ngapa pi ndu yi hana me: yi aú liyi ne bhúlá nane mane de. Yi mbíla mangbo lele yi makpe, maka yi nde lie-o. Yi tsia lele nabhuka li Ebhe aha e pi yi ngú nambíla me da yi ngae dho-ie. <sup>4</sup> Koli 'lá kpála bha bini, engú bini oyáyá tété bhelé inde ngamene okulu kpikpikpi. <sup>5</sup> A viti bhadi pi ní bini. Abana ní nde lie bhelé-e, ní akolo koli kpála bini bhú nakpøtø liní ne Yesu Kilisito-o . Ní atsia akpøtø liní maka oyá kpála-kuti akpøtø lie lie-o.

<sup>6</sup> Ebhe aha pi ní oangu ngangá ngú namene kulu nedi. Ani aha pi ní padhá bhú bádha bhú 'bu gba e, li lele maka anga li bua ani lie-o. Kaka-a, li suka ní sia angu nakpokpo eli inde ayie ka Ebhe-e, a ayo me, ani kpokpo nakpata lele nabhuka gba e-o. <sup>7</sup> Li Ebhe ha pi kpála koko angu nateteke obi e, a ayo me ani teteke uo. Li Ebhe ha pi koko angu nasuno 'ngú pi okpála koko-o,



a ayo me ani suno. <sup>8</sup> Li Ebhe ha pi kpála koko angu nato masi bhú obi e-e, a ayo me ani to masi bhú uo. Li Ebhe ha pi kpála koko angu napu 'he pi obi e-e, a ayo me ani pu ne bua e hana. Li Ebhe ha pi kpála koko angu nau pí 'ndji obi e-e, a ayo me ani mene kulu angu-o ne bádha bua. Li Ebhe ha pi kpála koko angu nateteke obhulu ndibhili-e, a ayo me ani mene ne djali.

*Lele nakobho gba omabhuka*

<sup>9</sup> Yi du ne mukunda pi ndu okpála hana ne bua bini. Yi adú apa 'ngú na mukunda bha ne 'bhé yi de. Yi yala siti 'ngú, yi dhedhe li bádha 'ngú. <sup>10</sup> Yi du ne mukunda sunda yi maka a ayo lie me ondaise du ne mukunda sunda o. Yi du ne mazima sunda yi na paká paká. <sup>11</sup> Yi ha liyi pi kulu ne angu yi hana. Yi adú ne obhulu ipio de. Yi mene kulu liyi pi Ngámá ne bua yi hana. <sup>12</sup> Yi du bhú djali kabula yi nga'o 'to yi lie 'to ohe li Ebhe apa me ni ahá e pi yi-o. Yi kibila okpekpeke da 'ngú ne 'ndjá bua. Yi ayó Ebhe ne ndala tété de. <sup>13</sup> Yi teteke ondaise yi inde bhú ndibhili-o. Yi sia obhende ngago li yi-e ndjindji.

<sup>14</sup> Yi yo Ebhe me ani tuko bisagu pí okpála bhende ngato mbolo li yi-o. Yi ayó de me Ebhe tu pøjø li uo de. <sup>15</sup> Yi kpi djali bhú dabili bini ne obhende bhú djali-o. Yi ku 'gbá bhú dabili bini ne obhende bhú 'gbá-o. <sup>16</sup> Yi du nadje liyi sunda yi ne obi yi ndjindji. Yi adú ne 'ngbé 'ndji de, engú bini, yi ziba ndu kulu hana inde u ahá e pi yi-o, abana i du bha kulu li okpála ngau e padhá. Yi aú liyi de me ni ambila ndu 'ngú hana-a de.

17 Yi agíe siti pí siti de. Yi le ne kpéke me yi mene bádha 'ngú kala ndu okpála hana. 18 I du li naayi-e, yi mene ne kpéke me yi du bhú guo 'ngú ne ndu okpála hana. 19 Ngayi okpála na mukunda gba ma-a, yi agíe siti pí okpála de, yi 'o mangbo me Ebhe gie siti pí uo ngae. Padhá de, anga Ngámá Ebhe apa bhú Bhuku gba e me: «Ngama-a, ma agíe siti 'ngú li okpála amene e li yi-e ngama.

Ngama makpe,  
ma améne uo nakpata lele engú u amene e li yi-  
o.†»

20 Engú bini, pí yi-e, yi mene mangbo maka li Bhuku gba Ebhe-e apa lie me:

«I du me a nde li bhulu yala gba mu-o ne gumu-o,  
mu de ha ezú pí ani.

I du li ani ne gumu 'ngu-o,

mu de ha engu nandji mandji pí ani.

Padhá de, anga mu mene mo-o, a adú mugito me  
mu ngabu

ndjekedhe djua na dédé pí 'ndji ani.†»

21 Mo o'ó de me siti 'ngú ha angu ni-e de. Engú bini, ha mangbo angu siti 'ngú ne namene bádha 'ngú.

## 13

### *A ayo me ní manga ongámási mamanga*

1 A ayo me ndu yi hana, yi manga ongámási inde pí 'ndji ní-e mamanga. Padhá de, anga ndu okpála hana inde ngau ngámá-a, u au ka Ebhe.

† 12:19 12:19 Tsia bhú Det. 32:35. † 12:20 12:20 Tsia bhú Gbt. 25:21, 22.

Ani a'o okpála inde ngau ngámá-a ngae. <sup>2</sup> Kpála inde ngagbe kpéke 'ndji li ongámási-e ngagbe bhomu-o kpéke 'ndji li líli inde li Ebhe a'o e-o. Okpála inde ngamene mo-o agbéle ke 'ngú gba Ebhe-e pí o makpe. <sup>3</sup> Okpála inde ngamene ngbili 'ngú kpekpe ongámási de, engú bini, a kpekpe mangbo ongámási ne okpála inde ngamene siti 'ngú-o. Kaka-a, li mu kúnda me ni adú nakpe ongámási de-e, mene bádha 'ngú ngubula me mu du nanga bhú djila ongámási manga.

<sup>4</sup> A mo-o. Padhá de, anga ongámási ngamene kulu inde li Ebhe aha e pí uo-o ngubula me u teteke yi, amba yi du amene bádha 'ngú. I du la me mu nde ngamene siti 'ngú-o, mu de kpe ongámási makpe! Padhá de, anga angu li Ebhe aha e pí uo-o, ani ha padhá de. Ani aha pí uo, anga ani a'o uo bhú kulu gba e ngú nasuno ke 'ngú gba e pí okpála inde ngamene siti 'ngú. <sup>5</sup> Kaka-a, a ayo me yi manga ongámási mamanga. Yi amánga bha bini uo ka nakpe ke 'ngú gba Ebhe-e de, engú bini, yi manga di uo ka anga yi ambila li bua nakpokpo kú 'ngú gba yi-e ndjindji me, a ko bádha 'ngú.

<sup>6</sup> A di bhomu-o ta 'ngú yi ngakala mandjandja ka e ko. Padhá de, anga Ebhe a'o ondombi na mandjandja ngubula me u mene kulu bhomu-o. <sup>7</sup> Yi ha pí kpála ne kpála ehe inde ati ne ani-o. Yi futa ndu mandjandja hana inde a ayo me yi futa e-o. Yi manga ongámási inde a ayo me yi manga o-o mamanga.

*Ndu líli hana agbite lie bhú mukúnda*

<sup>8</sup> Yi adú ne bopulu gba kpála bini de. Yi dũ bha bini ne koli bopulu bini na mukunda inde yi nde ne e sũnda yi-o. Kpála inde ne mukunda pi obi e-e, ani amene bhomu-o ndũ líli gba Ebhe-e hana má kpøkøbhø! <sup>9</sup> Líli gba Ebhe-e apa me: «Mo okúnda ølø, i dũ di-e bhoko gba kpála koko de, mo obhélø kpála de, mo ozí 'he de, mo odú ne gumũ 'he gba kpála koko de.» Olíli bhomu-o ne ndũ olíli koko hana agbite lie bhú koli líli bini inde me: «A ayo me kũnda kilí mũ maka mo okũnda limũ lie ngamũ makpe.†» <sup>10</sup> Kpála inde ne mukunda pi kilí e, ani méne ani sisiti belegũ de bini. Kaka-a, mũ dũ ne mukunda pi kilí mũ-o, mo omene bhomu-o ndũ líli-e hana.

*A ayo me ní dũ bedhe ndũ nedhinga hana*

<sup>11</sup> Yi 'o 'ngú bhomu-o li bua yi, anga yi mbila nedhinga ní nde bhú e hana. A inde-e nedhinga ayo lie me yi dũ li zũkũ. Nedhinga inde li Ebhe akóbho ní lie akolo masikpe, a matá tsutsu maka nedhinga nani ní abhuka lie ade. <sup>12</sup> Ekpí-e abi abhue, ngbikpi ibili masikpe. Kaka-a, ní adú matá namene engú na bití de. Ní dyi li kũte ní otia 'gú inde u agúgu 'gú ne e ne ngbikpi-o. <sup>13</sup> Ní mene 'he liní ndjindji maka okpála inde ngamene 'he ne ngbikpi. Ní adú nadho osisiti 'bi de, ní adú nalangba ne pandi de. Ní adú nasi ne olisi, i dũ di-e obhosi ngangá de. Ní adú nagbe bhayiki de, ní adú di ne 'ngbé bua li okpála koko de. <sup>14</sup> Yi dyi mangbo Ngámá Yesu Kilisito li kũte

† 13:9 13:9 Tsia bhú Eki. 20:13-17; ne bhú Det. 5:17-21; di ne bhú Lev. 19:18.

yi maka tia 'gú. Yi adú nadhuku maka li kute yi akunda lie de.

## 14

### *Yi aú okpála koko bhú djila yi padhá de*

<sup>1</sup> Yi sia kpála inde bhubhuku bhú 'bu nabhuka-o , yi abí bhayiki ne aní pindji engú bhende atsia mabhundja gba ani-e de. <sup>2</sup> Ní ha nga kukulu pindji engú na ezú. Okpála koko ngabhuka me o ti da nazú ndú 'he hana. La-a, okoko inde bhubhuku bhú nabhuka-a ngabhundja me a ndjindji bha bini ne nazú okpálá. <sup>3</sup> A ayo de me kpála bhende ngazú ndú 'he hana-a u kilí e inde i zú mbilika de-e padhá-a de. A ayo di de me kpála bhende i zú mbilika de-e u di bhende ngazú ndú 'he hana-a padhá-a de. Padhá de, anga Ebhe aziba di ani. <sup>4</sup> Ngamú-o, mú ne da ngú nakodho 'ngú gba kpála na kulu gba kpála koko-o? Ngámá na kulu ne angu nakodho 'ngú gba kpála na kulu gba e ngae, abana ani mene babadha, ne me ani ti li kpadji na kulu gba e-o. Ma au la bhadi me ani alú kpekpeke, anga Ngámá Yesu ne angu ngú nali ani me ani atí-i de.

<sup>5</sup> Okpála koko ngabhundja me oekpí koko ane okoko ne tata. La pí okpála koko, ndú 'kpí hana viti bha bini. A ayo me kpála ne kpála kə mboli engú ani ngabhundja e li bua e ndjindji me a ko kukulu 'ngú. <sup>6</sup> Kpála inde ngau ekpí koko ngbéngbé-e, ngadhögə Ngámá gba ní-o. Kpála inde ngazú ndú 'he hana-a, ngadhögə di bhomú-o Ngámá gba ní-o. Padhá de, anga ani ngagie heni pí Ebhe pindji ezú inde ani ngazú e-o. Kpála

inde i zu ndu 'he hana de-e ngamene mo-o ngú nadhøø Ngámá gba ní-o. Aní di ngagie heni pí Ebhe pindji ezú inde aní ngazú e-o.

<sup>7</sup> Yi mbíla ndjindji me kpála bini ade bhú ká ní inde ngakobho ka e makpe. Kpála bini la di ade inde ngakpi ka e makpe. <sup>8</sup> I du me ní nde bhú mukobho-o, ní ngakobho ngubula me ní toko Ngámá gba ní-o. I du me ní mu di-e, ní amu ngú naha sangu pí Ngámá gba ní-o. Kaka-a, belegu ní du bhú mukobho, belegu ní mu di mamu-o, ndu ní hana, ní ne okpála gba Ngámá Yesu. <sup>9</sup> Padhá de, anga Yesu Kilisito akpi, aní atsia azuku ngubula nadu ngámá gba okpála inde bhú mukobho bhú dabili bini ne obhende amu-o. <sup>10</sup> I nde lie mo-o, ngamu-o, mu ngakodho 'ngú gba ndai mu-o ka ní? Ngamu-o, mu ngau ndai mu bhú djila mu padhá ka ní? Ndu ní hana, ní alú kala Ebhe ngú napa me aní kodho 'ngú gba ní-o. <sup>11</sup> Padhá de, anga Bhuku gba Ebhe-apa me:

«Ngama Ebhe Ngámá inde uu-o, ma apa pí yi na paká me

ndu okpála hana atutu lipuku o kuto kala ma.

Ndu uo hana tsia pá me ma ne Ebhe.†»

<sup>12</sup> Bhobhomu-o akunda napa me kpála ne kpála bhú ká ní akpókpo engú inde aní amene e ngae makpe-e pí Ebhe.

*Mo otó kilí mu bhú siti 'ngú de*

<sup>13</sup> I nde lie mo-o, yi 'o nakodho 'ngú gba obi yi-e ma'o. Yi 'o mangbo li bua yi me a ayo de

† 14:11 14:11 Tsia bhú isa. 45:23.

me ní mene engú inde li kilí ní asendele ka e de, ngú napa me aní li bhú siti 'ngú-o de. <sup>14</sup> Bhú makpètse gba ya ne Ngámá Yesu Kilisito-o, ma ambila na paká me ezú na ligina ade. Engú bini, li kpála bini bhundja me ezú inde-e sisiti-e, ezú bhomu-o akolo ligina pí aní. <sup>15</sup> Í dú me mú nde ngato likabhu li bua ndai mú píndji ezú inde mú ngazú e-e, bhobhomu-o a akúnda napa me mú ne mukúnda pí aní ade. Kaka-a, lila límú me ní ató kpála inde li Kilisito akpi pí e bhú ngita kabula 'ngú na ezú de. <sup>16</sup> Lí ehe dú bhú djila mú ndjindji-e, mo oméne de, í dú me mú nde au me, li mú mene e li okpála koko pá 'ngú tété sisiti-o.

<sup>17</sup> Padhá de, anga Nau gba Ebhe-e , a ko engú na ezú, í dú di-e engú na pandi de. Engú bini, Nau gba Ebhe-e mangbo ne engú inde atsia kulu li Bu Bhobua ngamene e bhú ní-o. Bu Bhobua ngaha pí ní engú inde ngbingbili, aní ngaha pí ní nadú ne guo 'ngú sùnda ní, ne nadú bhú djali. <sup>18</sup> Kpála inde ngamene kulu gba Yesu Kilisito li kpadji bhomu-o nganga li Ebhe ngae. Okpála ngapa di li aní me aní ngamene bádha 'ngú. <sup>19</sup> Í nde lie mo-o, a ayo me ní gili namene engú inde ngato guo 'ngú sùnda ní, engú inde ngamene me ní teteke liní li kpadji gba Ebhe-o.

<sup>20</sup> Mo obhéle kulu gba Ebhe-e ka engú na ezú de. A na paká me ndú ezú hana ndjindji ngú nazuzú. La-a, a ndjindji ade me ní dú nazú 'he inde ngato kpála bhú siti 'ngú-o de. <sup>21</sup> Engú inde ndjindji-e ngae inde: a ayo natse nazú mbilika, a ayo natse nandji pandi, a ayo natse ndú 'he hana inde í tí da nato kilí mú bhú siti 'ngú. <sup>22</sup> Lila engú

inde li bua mu ngapa e pi mu pindji engú na ezú di ne bhe na pandi-e pi mu makpe. Mo opá pi kpála koko de, engú ango-o du bha sánda mu ne Ebhe. A ko djali pi kpála inde li bua e yoko e li 'ngú bini de bhú ká ongú inde li bua ani ngatima ani me ani mene e-o. <sup>23</sup> La-a, Ebhe a'ó 'ngú pí kpála inde ngazú 'he inde li bua nakpokpo kú 'ngú gba e ngayoko e li e-o. Padhá de, anga ani ngamene engú inde i lu pí nabhuka de. Yi mbila hana me, ndu 'ngú hana inde li kpála ngamene e me a nde lu pí nabhuka de-e, a ko siti 'ngú.

## 15

*A ayo me ní mene engú inde nganga li obi ní mangá-o*

<sup>1</sup> A ayo me nganí okpála inde alu kpekpeke bhú nabhuka-a , ní teteke di okpála bhende kpekpeke ade-o. A ayo de me ní du bha bini namene engú bhende nganga li ní-e de. <sup>2</sup> A ayo me ní mene engú inde nganga li obi ní ngubula nateteke uo, amba u nu li kpadji gba Ebhe-e ne kalanu. <sup>3</sup> Padhá de, anga Yesu Kilisito ngae makpe gili nani engú inde adu anga lie de. Engú bini, a akolo li ani maka u aye lie bhú Bhuku gba Ebhe-e me: «Okpála asobho mu, Ebhe, abhomu-o, sobho ango-o atsia aku li kute ma.†»

<sup>4</sup> Ndu ongú hana inde u aye nani e bhú Bhuku gba Ebhe-e , u aye ngubula nasuno pi ní kukulu 'ngú, ngú napa me ní du na'o 'to ní 'to Ebhe. Padhá de, anga Bhuku ango-o ngato bhú ní masi,

† 15:3 15:3 Tsia bhú Ets. 69:10.



a la di ngaha pi ní nadu ne 'ndjá bua. <sup>5</sup> A ayo me Ebhe inde ngato masi bhú okpála-a, inde di ngaha 'ndjá bua pi uo-o mene me yi du ne mabhundja bini, nakpata lele mukobho gba Yesu Kilisito. <sup>6</sup> Abhomu-o, ndu yi hana bhú dabili bini, ne koli eli bini, yi tsia dhégo Ebhe, 'Dyi Ngámá gba ní Yesu Kilisito-o.

*Ndu okpála hana atóko Ebhe*

<sup>7</sup> Kaka-a, yi du nasia liyi sunda yi ne bua yi bini maka li Yesu Kilisito asia di yi lie-o. Yi mene mo-o ngubula me okpála dhégo Ebhe. <sup>8</sup> Ma apa pi yi na paká me, Yesu Kilisito akolo nani kpála na kulu gba omaYuda, ngubula me ani suno pi uo me Ebhe papa naae eu de. Ani ago nani ngú nabedhe 'bhé engú inde li Ebhe apa nani me, ni améne e pi onguo ogbi uo-o. <sup>9</sup> A ayo nani di me okpála inde ne omaYuda ade-e, toko Ebhe kabula ndjinga gba ani-o. A maka u aye lie bhú Bhuku gba Ebhe-e me:

«Kaka-a, ma atóko mu bhú ká okpála inde ne omaYuda ade,  
ma alí oetsi pi mu.†»

<sup>10</sup> Bhuku gba Ebhe-e apa matá di me:  
«Ngayi okpála inde ne omaYuda ade-e,  
a ayo me yi kpi djali bhú dabili bini  
ne okpála gba Ebhe-o.†»

<sup>11</sup> A atsia apa matá di li bili koko me:  
«Ngayi, ndu yi hana okpála inde ne omaYuda ade-e,  
a ayo me yi toko Ngámá Ebhe.

† 15:9 15:9 Tsia bhú Ets. 18:50. † 15:10 15:10 Tsia bhú Det. 32:43.

A ayo me ndu okpála hana toko ani.†»

12 Polofeta Isaya apa di me:

«Kpála bini akóto bhú piga gba Yese,  
ani agó ngubula nau ngámá pí 'ndjí okpála  
inde ne omaYuda ade-o.

Okpála ango-o a'ó 'to o 'to ani.†»

13 A ayo me Ebhe inde amemene me okpála du na'o 'to o 'to ni-e bedhe yi ne djali bedhe di ne guo 'ngú , anga yi abhuka ani. Abhomu-o, yi tsia dú na'o 'to yi 'to ani na pakápaká bhú angu gba Bu Bhobua-o .

*Polo akpokpo 'ngú pindji kulu gba e*

14 Ondaise ma, ma ambila mbámhá me yi abedhe ne bádha 'ngú bhú yi bedhe. Ma mbila di hana me yi ambila ndu 'ngú inde a ayo me yi mbila e hana, di ne me yi ti da nasusuno sánda yi. 15 Belegu inde lie mo-o, ongu bini bini bhú balua inde-e, ma alu pépé kpekepeke ngubula me 'ndji yi ayie tété de. Ma aye mo-o kabula bádha bhú 'bu inde li Ebhe asuno e muma-o. 16 Ebhe a'o ma kpála na kulu gba Yesu Kilisito bhú ká okpála inde ne omaYuda ade-o. Ma aha lima libhomu pi Ebhe ngubula nakpokpo Bádha Ngali gba ani-e pi uo ngubula me u bhuka ani, amba u du maka makiso inde nganga li ani manga. Makiso ango-o, Bu Bhobua a'o kpi pi ani.

17 I nde lie mo-o, ma ne gindaginda bhú kulu inde ma ngamene e pi Ebhe-o, anga ya akpetse liya ne Yesu Kilisito bhú dabili bini. 18 Ma ti da napa 'ngú koko bini de. Ma apa bha bini engú

† 15:11 15:11 Tsia bhú Ets. 117:1. † 15:12 15:12 Tsia bhú Isa. 11:10.

inde li Yesu Kilisito amene e li kpadji gba ma-o. Aní amene me ma gbele okpála inde ne omaYuda ade-e kala Ebhe ngubula me u dɔ namanga aní. Aní amene mo-o bhú oeli inde ma akpokpo e-o, di ne bhú okulu inde ma amene e-o. <sup>19</sup> Aní amene di mo-o bhú ongamba 'ngú ngangá di ne bhú nau maka li Bu Bhobua gba aní-e adɔ nasuno angu gba e lie-o. Abhomɔ-o, ma atsia akpokpo Bádha Ngali gba Yesu Kilisito pí okpála ne ndɔ bili hana, nayie bhú Yelusalema nakolo makolo bhú ndu doto na Ilili. <sup>20</sup> Ma adɔ nakunda ndɔ 'kpí hana nakpokpo Bádha Ngali-e li bili inde li okpála dje nga engú gba Yesu Kilisito lie de-o. Ma dɔ nakunda nakpokpokpo li bili inde u adje engú gba aní-e lie adje-e de, ngubula me ma ayíki eti li bili li kpála koko abhɔ ka kulu lie abhɔ-o de. <sup>21</sup> Ma amene maka u aye lie bhú Bhuku gba Ebhe-e me:

«Obhende u kpokpo nga nani engú gba aní-e pí  
o de-e,  
u aú aní.  
Obhende i dje nga nani engú gba aní-e de-e,  
u aké mbolimboli.†»

<sup>22</sup> A bhomɔ-o engú inde aní kpadji mɔma bhɔtsibhɔtsi me, ma akólo li yi de-o.

*Gumɔ gba Polo ngú nanɔ bhú gudhɔ na Loma*

<sup>23</sup> Kalanga bhelé ane, ma adɔ ne gumɔ nakolo li yi, engú bini, kulu adɔ nani kpadji mɔma. La mbia inde-e, kulu gba ma bhú ondu doto ango-o andjia. <sup>24</sup> Sunda 'kpí inde-e, ma adji bhú Esipanye. Li ma dɔ nanɔ-o, ma apú bhú Loma

† 15:21 15:21 Tsia bhú Isa. 52:15.

ngubula me ní si mbo ne yi ekpí bhisi. Pipíta-a, yi téteke ma me ma kodho 'kpí.

<sup>25</sup> La-a pi mbia inde-e, ma adji nga bhú Yelusalema ngubula nateteke okpála gba Ebhe inde oo-o. <sup>26</sup> Padhá de, anga omabhuka na Makedonia di ne Akai au ndjindji me o po bhúla tia ngubula nateteke omabhuka inde bhú ndibhili bhú Yelusalema ne di. <sup>27</sup> U abhundja engú angoo bhú ngu o, a ayo la bhadi nako me u mene moko. OmaYuda ateteke okpála bhende ne omaYuda ade-e ngubula me u sia bádha bhú 'bu gba Ebhe . Kaka-a, a ayo bhadi me okpála inde ne omaYuda ade-e teteke omaYuda ne oehe inde aneke ka uo-o. <sup>28</sup> Abhomu-o, i du me ma nde andjia kulu bhomu-o andjia-a, ma kódho 'kpí bhú Esipanye. A akunda napa me pita nandjia nagapa tia u apo bhúla e li uo-o. Kala nakodho 'kpí ka ma-a, ma apú ngaiza agba yi. <sup>29</sup> Ma ambila me ma akólo lie agba yi-e, Yesu Kilisito asúno bádha bhú 'bu gba e pi ní na kuo kuo.

<sup>30</sup> Ondaise ma, ma ngayo ka yi ne 'li Ngámá gba ní Yesu Kilisito, di ne 'li mukunda inde li Bu Bhobua ngaha e me, yi kpetsə liyi ne ma bhú gbele inde ma ngagu e ne nayo Ebhe mama. <sup>31</sup> Yi yo Ebhe me nedhinga ma akólo lie bhú Yudaya-a, okpála inde i bhuka Yesu Kilisito de-e ató mbolo li ma de. Yi yo di Ebhe me, omabhuka inde bhú Yelusalema sia oehe inde ma adji ne e pi uo-o ne bádha bua. <sup>32</sup> Abhomu-o, i du me Ebhe nde akunda-a, ma kólo agba yi ne djali li bua ma, ní tsia dú ne yi bhú dabili bini. <sup>33</sup> A ayo me Ebhe inde ahaha guo 'ngú-o du bhú dabili bini ne ndu

yi hana. A adu moko.

## 16

### *Polo yi okpála bini bini na Loma mayi*

<sup>1</sup> Ma ngakpokpo 'ngú pi yi pindji ndai ní na øøø Foebe. Aní ngamene kulu bhú Dadjua gba Ebhe inde bhú Sekele-o. <sup>2</sup> Lì aní akólo lie agba yi-e, yi de sia aní ndjindji kabula 'lì Ngámá gba ní Yesu Kilisito . A ayo me okpála gba Ebhe-e du namene moko. Yi teteke aní ne ndu 'he hana inde aní nde ne gamu e-o, anga aní ateteke okpála bhelé, aní atsia ateteke belegu di ma.

<sup>3</sup> Ma yi Pilisila ne 'ko e Akuila mayi. Ngaya ne uo-o, ya amene kulu gba Yesu Kilisito bhú dabili bini. <sup>4</sup> U di me mu ngubula nakobho ma. Ma ngagie heni pi uo naali. A ko la bha bini ma kpi ma kpi de, engú bini, ndu oDadjua gba Ebhe hana inde bhú ndu doto gba omaYuda ade-e di ngagie heni pi uo. <sup>5</sup> Ma yi di okpála na Dadjua inde apøpøkøbhø bhúla o ngubula nayo Ebhe bhú 'ti gba uo-o mayi.

Ma yi ndai ma na mukunda Epainete mayi. A ko kpála na kalanu inde abhuka Yesu Kilisito bhú ndu doto na Adjia-o. <sup>6</sup> Ma yi di Malia inde amene kulu pi yi naali-e mayi. <sup>7</sup> Ma yi di okpála gba ma, Adolonikasi ne uo ne Djuniasi\* mayi. Ngaya ne uo-o, ya adu nako bhú tikpu bhú dabili bini. A ko obhulu titima inde li okpála mbila o ndjindji naali. U abhuka nani Yesu Kilisito muma kalanu.

---

\* **16:7** 16:7 Okpála bhelé ngabhundja me Adolonikasi nani ne 'ko Djuniasi. Okoko ngabhundja naao me a ko nani ondaise.

8 Ma yi di ndai ma na mukunda Apiliatusi mayi. Ya akpetse liya ne ani bhú 'bu Ngámá gba ní-o. 9 Ma yi di Ulubano mayi. Ya ngamene kulu gba Yesu Kilisito ne ani bhú dabilì bini. Ma yi di ndai ma na mukunda Sitakisi mayi. 10 Ma yi Apelesi mayi. Ani azu likabhu kabula Yesu Kilisito, ani atsia alu kpekpeke. Ma yi di okpála na piga gba Alisitobile mayi. 11 Ma yi di Elodiona mayi. A ko kpála na piga gba ma. Ma yi di okpála gba Ebhe inde bhú piga gba Nalasisi mayi. 12 Ma yi di Tilifene ne Tilifose† mayi. U aha lio ngú namene kulu gba Ngámá gba ní-e ne bua o bini. Ma yi di ndai ní na eelè na mukunda inde 'li e me Peleside mayi. Ani aha di lie ngú namene kulu gba Ngámá gba ní-e ne bua bini. 13 Ma yi Lufusi, kukulu bádha kpála na kulu gba Ngámá gba ní-e mayi. Ma yi di 'hi ani, inde ateteke ma maka kukulu ndili gba e makpe mayi.

14 Ma yi di Asikilite ne Felegone ne Elemesi ne Patalobasi ne Elemasi di ne ndu ondaise ní hana inde bhú dabilì bini ne uo-o mayi. 15 Ma yi di Filologe ne Djulie ne Nele di ne ndai e na eelè-o mayi. Ma yi di Olipasi di ne ndu okpála gba Ebhe-e hana inde ne uo-o mayi.

16 Yi yi liyi sùnda yi bhú dabilì bini ne mukunda gba omabhuka-o . Ndu oDadjua gba Yesu Kilisito-o hana yi yi mayi.

*Polo aha olíli na soso pi omabhuka na Loma*

17 Ondaise ma, ma ngagbele 'dje yi me: yi lila liyi ka okpála inde ngabi bhayiki li ongu

† 16:12 16:12 Tilifene ne Tilifose nani ne olisi.

inde u asuno e pi yi-e malila. Uo ngagbogbo bhṣṣu okpála, u tsia mbá bhúla uo li osisiti kpadji. Yi gbe liyi de uo magbe. <sup>18</sup> Padhá de, anga ongua okpála bhomṣ-o ngamene kulu gba Ngámá gba ní Yesu Kilisito ade. Engú bini, uo mangbo ngamene engú bhende a nga li o makpe. U ngapite okpála inde i mbíla kali de ne obabadha oeli di ne oeli ngú nabo kpála. <sup>19</sup> La pi yi-e, ndṣ omabhuka hana ambíla me, yi ngamanga Ngámá gba ní-o. Abhomṣ-o, ma ngakpi djali naali kabula yi, ma akúnda la di me yi mbíla engú inde babadha ngubula namemene, di ne me yi améne siti 'ngú de. <sup>20</sup> Ebhe inde ahaha guo 'ngú-o teteke yi me yi dedele Satana ne 'dhṣ yi má gala! A ayo me Yesu Ngámá gba ní-e suno bádha bhú 'bu gba e pi yi!

<sup>21</sup> Timoté, inde ngamene kulu bhú dabilí bini ne ma-a, yi yi mayi. Okpála gba ma, Lukiusi ne Djasone ne Sosipatele, yi di yi mayi.

<sup>22</sup> Ngama Teletiusi-e, Polo apa muma ngae me ma ye balṣa inde-e pi yi. Ma yi di yi mayi ne 'li Ngámá.

<sup>23</sup> Gayusi, inde ma ngadṣ gba e-e, yi di yi mayi. Okpála na Dadjua gba Ebhe inde ei-e ngapo bhúla o bhú 'ti gba ani. Elasiṣe, inde alilila tia na gudṣ-o bhú dabilí bini ne ndai ní Kualatusi, yi di yi mayi. [ <sup>24</sup> A ayo me bádha bhú 'bu gba Ngámá gba ní Yesu Kilisito dṣ bhú dabilí bini ne ndṣ yi hana! A adṣ moko.]

<sup>25</sup> A ayo me ní dhəgə Ebhe! Ani ti da naha angu pi yi ngubula me yi lṣ kpekpeke li kpadji gba ni-o, maka Bádha Ngali inde ma

ngakpokpo e pi okpála pindji Yesu Kilisito apa lie-o. Ebhe mbamba nga nani ta Bádha Ngali ango-o pi okpála kalanu de. <sup>26</sup> La mbia inde-e, ani ambamba tata pi okpála. Okpála la bhadi ngakpokpokpo maka li opolofeta aye nani lie-o. Ebhe inde ngadu duduama ne duduama akata nani opolofeta me u ye me ndu opiga hana dje Bádha Ngali bhomu, ngubula me okpála bhuka ani, amba u manga di ani. <sup>27</sup> A ayo me ní dhөгө Ebhe duduama ne duduama! Kukulú imbilangu makpe bha ka ani kpi e kpi. A ayo me ní dhөгө ani kabula Yesu Kilisito! A adu moko.



**Gandja na Mbia**  
**Mayogo: Gandja na Mbia (New Testament)**

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 3 Mar 2023 from source files  
dated 29 Jan 2022

6b4904fb-f8ce-5931-8218-7cee8914232c